



歴代史畧

参

リ78  
1850  
3





歷代史略卷三目錄

中世史下

第一篇 西晉

第一章 晉室失政 第二章 夷狄亂晉

第二篇 東晉

第一章 元帝保江東附漢改號趙 第二章 王敦蘇峻之叛附陶

侃鎮荆 第三章 趙成燕代事蹟

第四章 王導輔政及桓溫滅蜀

第五章 趙燕秦之興亡附桓溫北伐

第六章 桓溫逆謀 第七章 符堅之敗

第八章 中原大亂及後魏興

第九章 劉裕篡晉

第三篇 南北朝

第一章 魏太武經營四方附南北分朝

第二章 宋齊篡弒相仍 第三章 魏孝文尙文治

第四章 魏衰亂 第五章 侯景亂梁附北齊代東魏

第六章 周代魏陳代梁附北齊暴亂

第七章 周平北齊隋代周并梁陳

第四篇 隋

第一章 煬帝奢淫 第二章 隋國分崩

第三章 唐定禍亂

第五篇 唐上

第一章 李世民擅殺兄弟

第二章 太宗之治 第三章 太宗威加四夷

第四章 武韋之禍附玄宗再定內難

第五章 開元之政

第六章 安史之亂附吐蕃回紇之寇

第六篇 唐下

第一章 藩鎮跋扈附德宗失政

第二章 憲宗英武 第三章 宦官之禍

第四章 牛李之黨 第五章 宣宗明察

第六章 唐末大亂

第七篇 外國事略

第一章 突厥 第二章 回紇

第三章 朝鮮附渤海 第四章 日本

第八篇 文學宗教

第一章 學制 第二章 儒學文藝

第三章 佛教 第四章 道教

第五章 耶蘇教

第九篇 制度之沿革

第一章 職官 第二章 州郡

第三章 選舉 第四章 租稅

歷代史略卷三上

中世史下

第一篇 西晉

第一章 晉室失政

晉武帝魏名儒王肅之外孫也家本傳禮故郊廟之禮多從肅說其喪文帝及王太后素冠疏食以終三年優遇宗室務存禮意然性極奢縱嘗詔國內權禁嫁娶取良家女五千餘人入宮選之號哭之聲聞於外及并吳又選吳伎妾五千人入宮常乘羊車恣其所之宮人競取竹葉插戶鹽汁灑地以引帝車至便宴寢皇后父楊駿用事交通請

謁勳舊多被疏退與羣臣語未嘗有經國遠謀自吳既平  
謂天下無事盡去州郡武備漢魏以來羌胡鮮卑降者多  
處塞內諸郡屢因忿恨殺害吏民侍御史郭欽上疏謂宜  
及平吳之威漸徙內郡雜胡於邊地峻四夷出入之防明  
先王荒服之制帝不聽卒爲中國患

皇太子衷性不慧武帝爲納賈充女爲妃妃多權詐太子  
嬖而畏之衛瓘嘗侍帝宴陽醉跪於前以手撫床曰此座  
可惜帝意悟悉召東宮官屬設宴而密封尙書疑事令太  
子決之賈妃大懼倩外人代對令太子自寫以上帝悅因  
得不廢

武帝在位二十五年崩太子立是爲孝惠帝賈妃爲皇后

預政武悼楊后惠帝母武元后之從妹武元早崩入繼室

惠帝尊爲太后父駿爲太傅大都督賈后殺駿而廢太后

殺太宰汝南國名屬豫州今河南汝甯府王亮文帝庶弟殺太保衛瓘殺衛

將軍楚國名屬徐州今江蘇徐州府王瑋武帝庶子用張華裴頠王戎並管

機要華以文學才識名重一時后雖凶險猶知敬重與頠

同心輔政數年之間雖暗主在上而朝野安靜

王戎竹林七賢之一也立朝無所匡救與時浮沈性復貪

吝田園徧諸州執牙籌晝夜會計家有好李恐人得其種

常鑽其核凡所賞拔專事虛名阮咸之子瞻見戎戎問曰

聖人貴名教老莊明自然其旨同異瞻曰將無同戎咨嗟  
良久遂辟之時人謂之三語掾

是時王衍戎之從弟樂廣皆善清談朝野爭慕倣之衍神情明  
秀少時山濤見之曰何物老嫗生甯馨兒然誤天下蒼生  
者未必非此人也衍弟澄及阮咸畢卓等皆以任放為達  
醉狂裸體不以為非卓嘗為吏部郎比舍郎釀熟卓夜至  
甕閒盜飲為守者所縛旦視之乃畢吏部也樂廣聞而笑  
之曰名教中自有樂地何必乃爾初魏時何晏等立論以  
為天地萬物皆以無為本衍等愛重之裴頠著崇有論以  
釋其弊亦不能救也

賈后淫虐日甚太子遹非其所生后廢殺之永康元年惠

十一年征西大將軍趙國名屬冀州今直隸趙州王倫文帝庶弟矯詔勒兵入

宮廢后殺之殺司空張華尚書僕射裴頠自為相國淮南

國名屬揚州今安徽鳳陽府及滁和二州廬州府治王安武帝庶子率兵討倫不克而死

倫加九錫明年逼帝禪位黨與皆為將相奴卒亦加爵位

每朝會貂蟬盈坐時人語曰貂不足狗尾續齊國名屬青州今山東

青州王同武帝之姪鎮許昌縣名潁川郡治今河南許州成都國名屬益州今四川成都

王穎武帝庶子鎮鄴縣名魏郡治今河南彰德府臨彰縣河閒國名屬冀州今直隸河閒府獻

縣王顥宣帝姪孫鎮關中其舉兵討倫倫伏誅同入輔政驕奢

擅權太安元年惠帝十三年顥檄長沙國名屬荊州今湖南長沙府王乂武帝

庶使擊殺之

二年顯與穎舉兵反又奉帝數與穎兵戰永興元年惠帝十五年

年東海州府南境及江蘇海州王越宣帝之姪在京慮事不濟

收又納外兵使顯將張方殺又穎入京為丞相尋還鄴顯

表穎為皇太弟丞相如故乘輿服御皆遷於鄴顯為太宰

大都督越奉帝討穎穎擊敗之迎帝入鄴越走歸國幽州

今直隸北境及盛京省都督王俊起兵擊穎穎戰敗奉帝還洛陽時

顯遣張方救穎方擁帝及穎趨長安顯廢穎更立豫章名國

屬揚州今江西南王熾為太弟二年越起兵於徐州今江蘇大

昌瑞州臨江三府王熾為太弟二年越起兵於徐州今江蘇大

江以北及山東沂范陽國名屬幽州今直隸王熾宣帝自

州府安徽泗州順天府涿州及易州

許昌應之光熙元年惠帝十七年越遣將西入長安奉帝還洛

陽越為太傅輔政熾為司空鎮鄴穎自武關在陝西東奔

途被執送於鄴幽之會熾卒熾長史殺穎顯亦為南陽名國

屬荊州今河王模東海王越之所殺

惠帝極昏愚值凶歲百姓餓死帝曰何不食肉糜方賈后

專政時人知亂將作索靖指洛陽宮門銅駝歎曰會見汝

在荆棘中耳趙王倫亂後宗室迭相殘滅晉國分崩諸王

與事者前後八人汝南王亮楚王瑋趙王倫齊王冏成都

世謂之八王之亂惠帝在位十七年食麪中毒而崩或曰

太傅越鳩之也太弟熾立是為孝懷帝



第二章 夷狄亂晉

匈奴自漢以來臣事中國入居塞內以先世為漢婿冒姓  
 劉氏魏武分其眾為五部左賢王劉豹單于於扶羅之子  
 也為左部帥居太原郡名屬并州今山西太原汾州二府茲氏縣名今汾州府治豹  
 子淵幼而雋異博習經史嘗曰吾恥隨陸無武遇高帝而  
 不能建封侯之業絳灌無文遇文帝不能興庠序之教豈  
 不惜哉於是兼學武事及長膂力過人姿貌魁偉初為任  
 子在洛陽豹死武帝以淵代為左部帥既而為北部都尉  
 五部豪傑幽冀幽州見前冀州今直隸中部及山東北境名儒多往歸之  
 成都王穎鎮鄴表淵監五部軍事使將兵在鄴淵從祖右

賢王宣謂族人曰漢亡以來我單于徒有虛號無復尺土  
 自餘王侯降同編戶今我眾雖衰猶不減二萬奈何斂手  
 受役奄過百年司馬氏骨肉相殘四海鼎沸左賢王英武  
 超世復呼韓邪之業此其時矣乃相與謀推戴之淵說穎  
 請歸發五部來助既至左國城故城在山西汾州府永甯州東北宣等上  
 大單于之號胡晉歸之者愈眾淵謂羣臣曰吾漢氏之甥  
 約為兄弟兄亡弟紹不亦可乎乃稱漢王追諡劉禪曰孝  
 懷皇帝祭漢三祖高祖世宗五宗太祖世宗中時惠帝永興  
 元年也淵子聰驍勇絕人博涉經史善屬文族子曜早孤  
 養於淵亦有文武才至是皆為淵將又有石勒者上黨郡名

屬并州今山西潞安武鄉縣名今屬沁州羯人也羯匈奴別部勒

父祖為其小帥并州今山西省除饑亂勒被掠賣為人奴

主人奇其狀貌而免之乃結壯士為羣盜已從漢勒有勇

力善騎射淵以為輔漢將軍

惠帝時氏羌屢侵擾關隴且歲薦饑略陽郡名屬秦州今

境天水郡名屬秦州今秦州諸郡民流移就食於漢川有

李特者其先巴西郡名屬梁州今蠻種也特祖始遷略陽

號曰巴氏特兄弟有材武以流民入蜀據廣漢郡名屬梁

成都府漢州今四川西南境牧刺史

及潼川府特自稱大將軍益州今四川西南境及貴州大半

羅尚擊斬之弟流代領其眾勢復盛流死特子雄代之攻

走羅尚取成都縣名蜀郡益劉淵稱王之歲雄亦稱成都

王後稱帝國號曰成

漢魏閒匈奴已衰鮮卑轉繁盛部族甚多至晉世有段宇

文慕容拓跋禿髮乞伏諸族徧布於北邊自遼東郡名屬

盛京省謂涼州無所不居而慕容拓跋二氏最著

武帝時慕容廆屢侵晉邊既而請降晉以為鮮卑都督自

遼東徙居徒河縣名屬遼西郡故城在又徙大棘城故城

州府義州西北修政撫民流亡多歸之及惠懷之世慕容部日以

強盛廆自稱鮮卑大單于

拓跋氏世居北荒不交南夏其俗以索辮髮因號索頭部

其酋曰可汗猶言單于也魏時詰汾可汗南還居匈奴故

地其子力微復徙盛樂故城縣名前漢定襄郡治後漢屬雲中郡故城在山西歸化城

南晉惠帝時力微少子祿官為可汗分國為三部一居上

谷郡名屬幽州今直隸宣化府之北自統之一居代郡屬幽州今宣化府蔚州及山西

東境大同府之北使兄子猗叅統之一居盛樂使猗叅弟猗盧

統之晉人附者稍眾猗叅渡漠北巡西略諸國降附者三

十餘國及猗叅祿官死猗盧總攝三部拓跋氏之盛始於

此夷狄亂華之禍萌蘖於漢魏至是乘晉之亂始四起

懷帝永嘉二年漢王劉淵稱帝徙都平陽縣名平陽郡治今山西平陽府

治遣楚王聰石勒等連攻晉內郡取之四年淵殂諡曰光

文帝太子和立忌聰欲殺之聰弒而代之

晉太傅越以羽檄徵四方兵入援卒無至者越自帥兵拒

石勒五年越卒勒追敗晉兵縱騎圍而射之將士十餘萬

人無一免者執太尉王衍等問以晉故衍具陳禍敗之由

云計不由己且言少無宦情不豫世事勒曰君少壯登朝

名蓋四海身居重任何得言無宦情邪破壞天下非君而

誰夜使人殺之

漢兵進陷洛陽執懷帝送平陽封為會稽郡公帝姪秦王

業趨許昌六年雍州今陝西西安同州鳳翔三府及甘肅涇州刺史賈疋迎入

長安奉為皇太子建行臺石勒引兵據襄國縣名屬廣平郡今直隸順

德府 漢以為冀州牧明年孝愍帝建興元年漢主聰宴羣臣使懷帝著青衣行酒尋殺之凶問至長安太子業舉哀即位是為孝愍帝愍帝建興四年漢中山王曜攻陷長安帝出降送諸平陽封為懷安侯漢主復命帝行酒洗爵又使執蓋遂殺之

第二篇 東晉

第一章 元帝保江東附漢改號趙

晉瑯琊國名屬徐州今山東沂州府王睿者武帝叔父瑯琊武王佃之孫也於惠懷為再從兄弟懷帝時為安東將軍都督揚州今江蘇大江以南鎮建業縣名丹陽郡治吳舊及安徽淮水以南都今江蘇江甯府治以王導為謀主每事咨焉睿名論素輕吳人不附導勸用賢俊得卞壺庾亮刁協等百餘人為掾屬謂之百六掾撫綏新舊江東歸心

周顛桓彝等避亂過江彝見睿微弱憂之既而見導退謂顛曰江左有管夷吾吾無憂矣諸名士遊宴新亭顛中坐

歎曰風景不殊舉目有江河之異因相視流涕導曰當戮力王室克復神州何至作楚囚對泣邪

愍帝以睿為左丞相詔以時進軍睿辭以江東未平洛陽

祖逖少有大志南渡請兵於睿睿素無北伐之志以逖為

豫州今河南東南境安徽刺史與兵千人不給鎧仗逖渡

江中流擊楫而誓曰祖逖不能清中原而復濟者有如此

江愍帝又以睿為丞相都督中外諸軍事長安陷睿出師

露次移檄北征實不行官屬勸即晉王位明年遂即帝位

是為中宗元帝以其據江東史謂之東晉

元帝大興元年即位二年漢主聰殂太子粲立太后父靳準弑

之自稱漢天王劉氏男女無少長皆斬之石勒討準破之

中山王曜自立於赤壁地名在山西絳州河津縣北封勒為趙公未幾

準被殺明年曜徙都長安改國號為趙祀上祖冒頓配天

勒與曜有隙自稱趙王史稱勒國為後趙

晉祖逖取譙城在河南歸德府夏邑縣北進屯雍邱縣名屬陳留郡今河南開封府杞縣

勸農課桑撫納新附後趙鎮戍歸逖者甚眾元帝以戴淵

為征西將軍都督司豫司州即魏之司隸校尉所部豫州見上逖以己翦荆

棘收河南地而淵雍容一旦來統之意甚怏怏又聞王敦

與廷臣構隙將有內難知大功不遂感激發病卒豫州士

女若喪父母

第二章

晉王敦蘇峻之叛

附陶侃 鎮荆

王敦太尉衍之弟也初與從弟導同心翼戴元帝亦推心任之敦總征討導專機政羣從子弟布列顯要時人語曰王與馬共天下敦為鎮東大將軍都督江今湖北武昌府及九江福建揚見荆今湖北及河南南陽府陝西興安府湖南西北境湘今湖南大半及兩廣北境交今廣南境及廣之兩廣安南國廣之大半六州諸軍事恃功驕恣帝畏惡之乃引劉隗刁協為腹心稍抑損王氏權導亦漸見疎外

敦參軍錢鳳等兇狡知敦有異志陰為畫策敦遂舉兵武

昌縣名武昌郡及江州治之今屬武昌府以誅劉隗刁協為名隗協勸帝盡

誅王氏帝不許導率宗族每旦詣臺城名在江甯府城西北待罪周

顛將入導呼之曰伯仁以百口累卿顛不願入見帝言導忠誠申救甚至帝納其言顛醉而出導又呼顛不與言顧左右曰今年殺諸賊奴取金印如斗大繫肘後既出又上表明導無罪導不知恨之帝召見導導稽首曰亂臣賊子何代無之不意今者近出臣族帝跣而執其手曰茂弘方寄卿以百里之命以為前鋒大都督敦至石頭城在江甯府城西據之協隗等分道出戰大敗而還帝令百官詣石頭見敦敦欲殺周顛戴淵以問導導不敢救遂見害後檢中書故事見顛表流涕曰吾雖不殺伯仁伯仁由我而死幽冥之中負此良友

太子紹幼而聰慧及長仁孝好賢禮士與庾亮溫嶠等為布衣之交王敦在石頭忌太子有勇略欲誣以不孝而廢之賴嶠等眾論得沮其謀敦不朝而去還武昌元帝憂憤成疾而崩在位六年太子立是為肅宗明帝

敦謀篡位移鎮姑熟

城名今安徽太平府治

以導為司徒自領揚州

牧明帝加導大都督督諸軍討敦敦將舉兵病篤使郭璞筮之璞曰明公起事禍必不久敦大怒曰卿壽幾何璞曰命盡今日日中敦斬之使兄含等帥眾向京帝自出屯南皇堂夜募壯士掩含軍破之敦聞含敗曰我兄老婢耳門戶衰世事去矣我當力行因作勢而起困乏復臥尋卒敦

黨悉平發敦屍斬之有司奏王氏當除名詔曰司徒導以大義滅親將百世宥之悉無所問

惠帝末年劉弘都督荊州威行江漢舉陶侃為將討平義

陽郡名屬荊州今河南汝甯府信陽州湖北德安府隨州等

叛蠻張昌又討破江東叛

將陳敏弘卒南州復亂元帝鎮江東以侃守武昌擊走湘州劇賊杜弼王敦表刺荊州既而忌之左轉廣州時王機盜據廣州侃直至討平之明帝以侃為征西大將軍都督荆湘等州軍事荊州士女相慶侃性聰敏恭勤檢攝眾事未嘗少閑嘗曰大禹聖人乃惜寸陰眾人當惜分陰諸參佐以談戲廢事者命取其酒器蒲博具悉投於江曰樗蒲

者牧豬奴戲耳老莊浮華不益實用君子當正其威儀何

有蓬頭跣足自謂宏達邪在軍四十一年明毅善斷人不

能欺威名赫然自南陵成名在安徽太平府繁昌縣西南至白帝城名在四川夔

州府城東二千餘里路不拾遺

明帝在位三年崩太子衍立年五歲是為顯宗成帝王導

與中書令庾亮尚書令卞壺輔政蘇峻前守臨淮郡名屬徐州今

安徽於敦再反時入衛有功威望漸著遷歷陽郡名屬揚州今安徽

和內史卒銳器精志輕朝廷招納亡命庾亮建議徵峻為

大司農峻拒命江州都督溫嶠聞之欲入衛亮不聽峻舉

兵犯闕卞壺力戰死亮奔依嶠嶠邀陶侃入討峻斬之

第三章 趙成燕代事蹟

趙主劉曜與後趙石勒連攻戰互有勝負曜攻後趙金鋪

城洛陽城西北隅也在今河南河南府城東北勒自將救之戰於洛陽趙兵大

潰曜醉墜馬為勒獲歸殺之卒平關西前趙亡勒稱天王

尋稱帝勒從子虎性殘忍每屠城邑鮮有遺類然御眾嚴

而不煩軍功最多勒封為中山王

勒饗羣臣問曰朕可方古何主或曰過於漢高勒笑曰人

豈不自知卿言太過若遇高帝當北面事之與韓彭比肩

耳若遇光武當並驅中原未知鹿死誰手大丈夫行事當

礪礪落落如日月皎然終不效曹孟德司馬仲達欺人孤



兒寡婦狐媚以取天下也勒雖不學好使諸生讀書而聽之時以其意論斷得失聞者悅服嘗使人讀漢書至酈食其勸立六國後驚曰此法當失何以遂得天下及聞留侯諫乃曰賴有此耳晉成帝咸和八年勒殂太子弘立中山王虎為丞相魏王尋弒弘自稱趙天王徙都鄴

成主李雄以兄子班為太子雄殂班立雄子越弒班而立弟期期忌族父漢王壽威名使出屯於外咸康四年成帝十三年

壽襲成都弒期而自立改國號曰漢

懷帝時拓跋猗盧已強并州刺史劉琨結為兄弟表為大單于封代公猗盧帥部落自雲中漢故郡今歸化城土默特界內入雁門

郡名屬并州今山西代州治甯武琨與以陘山名又名勾注在代州西

府治大同府西境朔平府南境北之地嘗為琨援大敗漢兵於晉陽縣名太原郡及并州治今山西太原

府太原猗盧城盛樂以為北都平城縣名舊屬雁門郡今大同府治為南都

愍帝進其爵為王食代常山屬冀州今直隸正定府二郡猗盧為其

子所弒國大亂自是內難相踵部落離散成帝時猗盧從

孫翳槐立翳槐弟什翼犍質於趙王石虎翳槐臨卒命諸

大人迎立之什翼犍雄勇有智略能修祖業始制百官號

令明白政事清簡於是東自濊貊東夷種名居今朝鮮北境西及破落

那漢大宛國今中亞細亞浩罕地率皆歸服有眾數十萬都盛樂拓跋氏

愈大

元帝時慕容廆大敗宇文氏取遼東遣使獻捷於晉元帝

以廆為平州今盛京省及朝鮮西境牧遼東公石勒殂之歲廆卒世

子皝立皝雄毅多權略喜經術其下勸稱燕王築龍城故城

在內蒙古土默特右翼西都之西摧段氏南卻趙王虎兵東伐高句麗

朝鮮三國之一今朝毀其都城北滅宇文氏襲扶餘東夷國名

今盛京東北境虜其王以歸

第四章 王導輔政及桓温滅蜀

晉成帝即位冲幼每見王導必拜既冠猶然以導為丞相

委以國政導性寬縱所任諸將多不奉法大臣患之初蘇

峻之亂庾亮激之也峻平亮泥首謝罪出為豫州刺史陶

侃卒亮代鎮武昌見導之專欲起兵廢之或勸導密為之

備導曰吾與元規休戚是同元規若來吾便角巾還第復

何懼哉亮成帝之舅也雖居外鎮而遙執朝權趨勢者多

歸之導內不能平嘗遇西風塵起舉扇自蔽徐曰元規塵

汚人導簡素寡欲輔相三世倉無儲穀衣不重帛及卒詔

喪葬參用天子禮

庾亮欲開復中原上疏請率大眾移鎮石城山名在河南汝甯府信陽

州東遣諸軍羅布江沔沔漢水異名為伐趙之規王導欲許之

太常蔡謨曰不能以大江禦蘇峻安能以沔水禦石虎乃

詔亮不許移鎮亮卒以其弟翼代之

翼爲人慷慨喜功名不尚浮華瑯琊內史桓溫桓彝之子豪爽有風概翼薦之曰英雄之才宜委以方召之任殷浩才名冠世翼弗之重曰此輩宜束之高閣俟天下太平徐議其任耳浩累辭徵辟時人擬之管葛翼請浩爲司馬不應翼以王夷甫嘲之夷甫者王衍字也

成帝在位十七年崩二子丕奕並在襁褓帝臨崩以弟瑯邪王岳爲嗣岳卽位是爲康帝庾翼以滅胡取蜀爲己任康帝建元元年欲悉眾北伐以桓溫爲前鋒都督詔加翼都督征討諸軍事康帝在位二年崩太子聃立年三歲是爲孝宗穆帝叔祖會稽郡名屬揚州今浙江紹興府王昱輔政穆帝永和

元年庾翼卒遺表以其子領荊州侍中何充曰荆楚國之西門豈可以白面少年當之桓溫英略過人西任無出溫者丹陽郡名屬揚州今江蘇江甯府尹劉惔知溫有不臣之志謂會稽王曰溫不可使居形勝之地王不聽以溫都督荆梁等州軍事梁州今陝西南境及四川東北境時漢主李壽已殂太子勢立驕淫不恤國事溫帥師伐之拜表卽行三年進至成都勢出降送詣建康卽建業晉封爲歸義侯李漢亡

第五章 趙燕秦之興亡附桓溫北伐

趙王石虎作臺觀於鄴又營長安洛陽二宮作者數十萬人發美女三萬人充內宮郡縣多強奪人妻其夫死者三

千餘人命太子宣出獵建天子旌旗戎卒十八萬虎望見  
笑曰我家父子如此自非天崩地陷當復何愁宣所過十  
五郡資儲皆空虎復命宣弟秦公韜繼出亦如之宣忌韜  
殺之虎又殺宣極慘酷立少子世爲太子晉永和五年虎  
稱帝尋殂太子世立其兄彭城王遵弒之而自立趙亂晉  
征討都督褚裒率師伐之晉人皆以中原指期可復蔡謨  
獨謂莫若度德量力必經營分表恐憂及朝廷裒部將敗  
沒裒退還

趙主遵謀殺大將軍石閔閔弒遵而立遵弟義陽王鑑鑑  
又欲殺閔閔幽鑑殺胡羯二十萬人六年閔弒鑑自稱魏

帝殺虎三十八孫盡滅石氏閔本姓冉爲虎所養至是復  
其姓時燕王慕容皝已卒世子儁立儁與弟垂伐趙拔薊  
城薊縣名今京城地徙都之虎子新興王祗自立於襄國七年祗  
爲其下所弒後趙亡八年燕兵破魏執冉閔歸殺之儁稱  
帝後徙都鄴儁太子暉立

初洛陽臨涓

縣名略陽郡治故城在甘肅秦州秦安縣東南

氏酋蒲洪驍勇多權

略羣氏畏服之漢主劉聰拜爲將軍不受自稱略陽公南

安

郡名屬秦州今甘肅鞏昌府北境

赤亭

在鞏昌府城東

羌姚弋仲亦有威望東

徙榆眉

漢故縣今陝西鳳翔府汧陽縣

戎夏襁負隨之者數萬自稱扶風

郡名屬雍州今陝西安府西北境及鳳翔府

公二人後皆附趙主劉曜又事後

趙石勒石虎虎以洪為流民都督居枋頭城名在河南衛輝府濬縣西南

後都督雍秦州秦州今甘肅南境以弋仲為西羌大都督居澠頭

戎名在直隸冀州棗強縣東北後為六夷匈奴羯鮮卑氏羌巴蠻大都督

石閔言於趙主石遵曰蒲洪人傑也今鎮關中恐秦雍非

復國家所有遵罷洪都督洪怒歸枋頭遣使降於晉及閔

篡趙洪弋仲各欲據關西弋仲遣其子襄擊洪洪迎擊破

之自稱三秦王改姓苻洪先擒趙將麻秋不殺而用其言

因宴為秋所鳩世子健斬秋率眾入長安自稱秦天王除

趙苛政尋稱帝弋仲遣使降於晉尋卒襄率其眾歸晉詔

屯譙城襄博學善談論江東人士皆重之

桓温既滅蜀威名大振晉廷憚之會稽王昱以殷浩有盛

名引為心膂欲以抗温及聞中原大亂復謀進取以浩都

督揚豫等州浩惡姚襄強盛遣兵襲之不克浩率諸軍欲

進據洛陽襄伏甲邀擊走之遣使降於燕主慕容儁浩連

年北伐無功桓温上疏請廢之乃免為庶人自是内外大

權歸温矣

永和十年温帥師北伐大敗秦兵於藍田縣名屬京兆郡今屬陝西西安

府轉戰至灞上灞水名在西安府城東秦主苻健閉長安小城自守

三輔京兆馮翊扶風三郡今西安同州鳳翔三府皆降温撫諭居民民爭持牛

酒迎勞男女夾路觀之耆老有垂泣者曰不圖今日復覩

官軍北海

郡名屬青州今山東青州府東境

王猛少好學儻有大志隱

居華陰

縣名屬宏農郡今屬陝西同州府

聞溫入關被褐謁之捫蝨而談

當世之務旁若無人溫異之問曰吾奉天子命除殘賊而三秦豪傑未有至者何也猛曰公不遠數千里深入敵境今長安咫尺而不渡灞水百姓未知公心所以不至溫默然無以應徐曰江東無卿比也溫與秦兵戰於白鹿原在灞水不利秦人清野溫軍乏食敗退欲與猛俱還猛辭不就明年秦主健殂太子生立

姚襄據許洛桓溫督諸軍伐之進至河上登船樓北望中原歎曰使神州陸沈百年邱墟王夷甫諸人不得不任其

責敗襄於伊水入洛陽謁諸陵置戍而還襄北奔平陽將

圖關中秦主苻生遣將拒擊斬之襄弟萇以眾降於秦

秦主生狂悖殘虐中外離心從弟東海王堅弒之自立為

秦天王或薦王猛堅一見如舊友自謂如玄德之遇孔明

也一歲五遷官舉異材修廢職課農桑卹困窮秦民大悅

晉穆帝在位十七年崩無嗣成帝子瑯邪王丕立是為哀

帝哀帝在位四年崩弟瑯邪王奕立會稽王昱為丞相哀

帝末年燕太原王慕容恪略取河南諸城與弟吳王垂共

攻洛陽克之恪垂皆燕主暉之叔父也恪以太宰輔暉國

威益振臨卒暉問以後事恪曰吳王文武兼資管蕭之亞

若任以大政國家可安不然秦晉必有窺窬之計曄不能  
 從委政叔祖太傅評晉帝奕太和四年桓温伐燕至枋頭  
 曄懼謀奔和龍即龍城垂請拒之大敗晉兵温走還垂威名  
 日盛太傅評忌欲殺之垂出奔秦五年秦王猛督諸軍伐  
 燕與評戰於潞川又名漳水在山西潞安府潞城縣北敗之長驅圍鄴號令  
 嚴明軍無私犯燕民各安其業秦王苻堅繼進入鄴執燕  
 主曄以歸封為新興侯關東悉平後又擊晉西鄙取梁益  
 二州  
 堅以猛為丞相加都督中外諸軍事文武兩寄巨細並關  
 秦王端拱無為委猛不疑猛剛明清肅賞刑必當由是秦

國大治富强無敵猛寢疾堅親為祈郊廟社稷至猛第視  
 疾訪以後事猛曰晉雖僻處江南然正朔相承上下安和  
 臣沒之後願勿以晉為圖鮮卑西羌我之仇敵終為人患  
 宜漸除之以安社稷言終而卒鮮卑謂慕容氏西羌謂姚  
 氏也堅哭之曰天不欲使吾平一六合邪何奪吾景略之  
 速也

第六章 桓温逆謀

晉桓温自哀帝時為大司馬都督中外諸軍事移鎮姑熟  
 陰蓄不臣之志嘗撫枕歎曰男子不能流芳百世亦當遺  
 臭萬年欲先立功河朔還受九錫及枋頭之敗威名頓挫

參軍郗超勸溫行伊霍之事以立大威權太和六年簡文帝咸安元年溫入朝白褚太后康帝后廢帝奕為海西公迎立會稽王昱是為太宗簡文帝簡文即位八閱月而不豫急召溫入輔不至遺詔溫依諸葛武侯王丞相故事帝崩太子昌明立是為烈宗孝武帝

初謝安少有重名前後徵辟皆不就士大夫相謂曰安石不出如蒼生何年四十餘桓溫請為征西司馬後與王坦之俱仕朝溫望簡文臨終禪位否便居攝既不副所望甚憤疑安坦之所為心銜之孝武帝甯康元年溫入朝詔安坦之迎於新亭都下洵洵或云欲誅王謝因移晉祚溫至百官拜於道側溫大陳兵衛延見朝士坦之甚懼流汗沾衣倒執手板安從容就席謂溫曰安聞諸侯有道守在四隣明公何須壁後置人邪溫命徹之與安笑語移日郗超臥帳中聽其言風動帳開安笑曰郗生可謂入幕之賓矣溫有疾還姑熟諷求九錫安坦之故緩其事尋卒

第七章 苻堅之敗

晉惠帝時張軌為涼州今甘肅蘭州府刺史治姑臧縣名武威

郡治今甘肅涼州府治威著西土懷帝陷沒軌遣兵助愍帝於長安

封西平郡名屬涼州今甘肅西甯府公軌子茂降趙主劉曜曜封為涼

王茂卒兄子駿嗣臣於後趙主石勒而恥之假道於李蜀



以通於晉穆帝時駿孫玄靚立稱藩秦主苻生叔父天錫  
弑玄靚而代之荒於酒色政亂秦王堅伐之兵至姑臧天  
錫面縛出降封爲歸義侯

匈奴劉衛辰居朔方

漢故都今內蒙古  
鄂爾多斯界內

爲代所逼求救於

秦秦遣兵擊代代王拓跋什翼犍使南部大人劉庫仁拒  
戰大敗衛辰庫仁皆故漢主淵之族也初代世子寔早卒  
繼嗣未定於是庶長子寔君殺諸弟并弑什翼犍秦兵趨  
雲中部眾逃潰秦王堅誅寔君分代爲二部自河以東屬  
庫仁自河以西屬衛辰使統其眾寔子珪尙幼母賀氏以  
珪依庫仁庫仁奉珪恩勤周備不以廢興易意

秦王堅滅燕取蜀平定涼代版圖之廣數倍晉國東夷西  
域六十二國皆朝貢堅意驕益窮兵勢遣呂光遠征欲平  
西域之未服者是時法制日頽不同王猛在時慕容姚氏  
竊欲乘其釁而堅不知也

晉以秦寇爲憂詔求良將可鎮禦北方者謝安以兄子玄  
應詔郝超歎曰安之明乃能違眾舉親玄之才足以不負  
所舉玄鎮廣陵

縣名廣陵郡治今  
江蘇揚州府治

得劉牢之爲參軍常領

精銳爲前鋒戰無不捷號北府兵秦人畏之

秦遣兵分道擊晉克襄陽

縣名屬襄陽郡晉梁州寄  
治之今湖北襄陽府治

執梁

州刺史朱序以歸已而議大舉或謂晉有長江之險堅曰

以吾之眾投鞭於江足斷其流時中外皆諫惟慕容垂姚  
萇勸之親征晉太元八年孝武帝十一年堅發長安戎卒六十餘

萬騎二十七萬水陸齊進運漕萬艘晉以謝安弟石為征

討大都督謝玄為前鋒都督督眾八萬拒之劉牢之帥精

兵五千趣洛澗水名在安徽鳳陽府懷遠縣西南擊破秦前鋒斬其將石

等繼進堅登壽陽城縣名舊名壽春晉淮南郡治今鳳陽府壽州望之見晉兵

部陳嚴整又望八公山在壽州東北草木皆以為晉兵憮然始

有懼色秦兵逼肥水在壽州東而陳玄使人謂曰移陳小卻使

我兵得渡以決勝負堅欲使之半渡而蹙之麾兵使卻秦

兵退不可復止朱序在陳後呼曰秦兵敗矣輒奔晉軍玄

等渡水追擊大敗之秦兵崩潰走者聞風聲鶴唳皆以為

晉兵至堅中流矢狼狽走還

謝安文雅有德量國家有難每鎮之以和靜方秦寇至朝

野震動安夷然出遊山墅捷書至安方與客碁攝書置床

上無喜色圍碁如故客問之徐答曰小兒輩遂已破賊既

罷入戶喜甚不覺屐齒折其矯情鎮物如此以太保卒

第八章 中原大亂及後魏興

秦軍既大敗鮮卑西羌乘釁而興氏運忽衰慕容垂起兵

河內郡名今河南自稱燕王是為後燕姚萇起兵北地郡名今陝

西安自稱秦王是為後秦慕容冲起兵平陽進逼長安

冲故燕主暉之弟也暉為秦王堅所殺冲乃稱燕帝是為

西燕冲攻長安堅出奔後秦王萇執而殺之堅子長樂公

丕稱帝於晉陽燕王垂定都中山郡名今直隸定州稱帝西燕弒

其主冲推段隨為燕王又殺隨而東立冲兄子忠為帝後

秦王萇入長安亦稱帝西燕又弒其主忠立慕容永備之從祖

弟為河東郡名今山西解州及蒲州府王永擊秦主丕不敗南走晉邊

將邀擊殺之永進據長子縣名屬上黨郡今屬山西潞安府稱帝丕族子

南安王登自立於南安引兵屢與後秦戰互有勝負後秦

主萇殂太子興立擊秦主登殺之秦太子崇奔湟中謂湟水之濱今甘肅西甯府稱帝為西秦王乞伏乾歸所殺苻氏遂亡時晉

太元十九年孝武帝二十二年也是歲燕主垂圍長子拔之殺西

燕主永西燕亡於是後燕後秦中分苻秦故地與晉國成

鼎足之勢

自苻秦失馭中原大亂慕容姚氏雖迭舉大號而威令不

能及遠河南梁益皆復附晉西陲有氏鮮卑匈奴諸部乘

時割據數十年間羣胡紛爭無所統一當是時索頭遺孽

再興於塞北征略夷夏國勢日盛舉北帶之地悉為胡人

所戡定

秦將呂光氏種也撫甯西域威恩甚著還據涼州稱涼天

王都姑臧是為後涼光殂太子紹立庶兄篡弒而代之光

從子超又弒篡而立其兄隆鮮卑乞伏國仁據隴右今甘肅蘭

州鞏昌秦主苻登封為苑川故城在蘭州府靖遠縣西南王國仁卒弟

乾歸立稱秦王是為西秦鮮卑秃髮烏孤起西平稱武威

郡名今甘肅涼州府王烏孤卒弟利鹿孤立稱河西王卒弟儁檀立

更立涼王是為南涼匈奴沮渠蒙遜推段業為主據張掖

郡名今甘肅甘州府業稱涼王是為北涼蒙遜弒業自稱張掖公又

有隴西郡名今甘肅鞏昌府人李暠據敦煌郡名今甘肅西州敦煌縣稱涼公是

為西涼

晉安帝隆安五年魏道武帝天興四年後秦王姚興伐後涼大破之

涼王呂隆降義熙中興使南涼秃髮儁檀守姑臧北涼沮

渠蒙遜擊破儁檀取姑臧都之稱河西王西秦乞伏乾歸

為其姪所弒世子熾盤立熾盤襲南涼滅之涼公李暠卒

世子歆立宋武帝時蒙遜擊殺之滅西涼其後熾盤卒太

子暮末立為夏主赫連定所滅蒙遜後附於魏魏太武帝

封為涼王及蒙遜卒世子牧健全太武滅之

初代劉庫仁為降人所殺其子顯立將殺拓跋珪珪奔賀

蘭部依其舅諸部大人推珪為代王徙居盛樂改國號曰

魏乞師於燕主慕容垂擊顯走之劉衛辰攻魏珪大破之

衛辰走死其子勃勃逃奔後秦垂惡魏之逼遣太子寶擊

之大敗垂殂寶立珪大舉擊燕進圍中山寶出奔龍城寶

族子詳稱帝於中山寶弟趙王麟襲殺詳自立魏拔中山  
麟走依叔父范陽王德德據滑臺城名在直隸衛輝府滑縣稱燕王是

為南燕麟謀反被殺燕主寶遇害於龍城寶子長樂王盛  
誅賊而立後為其下所弑叔父熙立南燕王德東略晉地

取廣固城名在山東青州府城西北都之稱帝德殂兄子超立

魏王珪已勝燕徙都平城建宗廟社稷即帝位是為魏太  
祖道武帝追尊遠祖可汗毛以下二十八人皆為帝時晉

隆安二年魏天興元年也史謂之後魏以別於曹魏道武帝惑

方士之說服寒食散藥發躁怒無常屢手刃人晉義熙五  
年安帝十三年魏天賜六年道武譴責賀夫人將殺之夫人告其子清

河郡名今山東東昌府北境王紹紹素兇狠夜入弑帝長子齊王嗣誅  
紹而立是為太宗明元帝

燕王熙故將馮跋作亂推高雲為主雲稱天王執熙弑之  
雲高句麗之支屬也為故燕主寶養子至是復其姓雲又

為其下所弑馮跋代之是為北燕秦王姚興使劉勃勃鎮  
朔方勃勃叛秦自謂夏后氏之苗裔稱大夏天王後築統

萬城都之故城在陝西榆林府懷遠縣西改姓赫連

第九章 劉裕篡晉

晉自敗苻堅以後江東無事孝武帝使弟會稽王道子錄  
尚書道子專權帝嗜酒流連而已有長星見帝舉酒祝之

日長星勸汝一盃酒世豈有萬年天子邪張貴人寵冠後宮年近三十帝戲之曰汝以年亦當廢矣貴人使婢以被蒙其面而弑之在位二十四年太子德宗立是為安帝會稽王以太傅輔政

安帝性不慧寒暑飢飽不辨會稽王闇懦專委世子元顯生殺任意民心騷動妖賊孫恩自海島出作亂敕劉牢之等討之彭城縣名沛郡治今江蘇徐州府治劉裕勇健有大志牢之引參軍事嘗遣覘賊遇賊數千人從者皆死裕奮長刀獨驅之眾兵因進擊賊大破之恩屢為裕所敗赴海死其黨盧循復起

桓温之子玄嗣父為南郡屬荆州今湖北荆州府公負其才地以雄

豪自處嘗守義興郡名屬揚州今江蘇常州府宜興縣鬱鬱不得志嘆曰父

為九州伯子為五湖長棄官歸國後為江州刺史尋都督

荆江入州荆江司雍秦梁益甯也時司雍寄治荆州秦寄治梁州遂舉兵反入建康

殺元顯又殺道子玄為相國楚王加九錫迫安帝禪位劉

裕起兵京口城名今江蘇鎮江府治討玄大破其兵玄出走死於江

陵縣名南郡及荆州治今荆州府治帝復位

南燕主慕容超侵掠晉邊義熙五年安帝十三年魏道武帝天賜六年劉

裕抗表伐之明年拔廣固執超送建康殺之南燕亡盧循

乘裕北伐出自番禺縣名南海郡及廣州治今廣東廣州府治順江而下逼京

邑裕急還拒之循乃退裕追討破之循奔交州為刺史所擊斬

桓玄之亂益州參軍譙縱殺其刺史稱藩於後秦秦王姚

興封為蜀王裕遣將討平之十二年魏明元帝泰常元年興殂太子

泓立裕督諸軍伐秦拔洛陽明年破潼關在陝西同州府華陰縣東今置

廳遂入長安泓出降送建康殺之後秦亡夏王赫連勃勃

聞裕伐秦曰裕取關中必矣然不能久留若以子弟諸將

守之吾取之如拾芥耳裕將還三秦父老詣門流涕曰殘

民不霑王化於今百年始覩衣冠人人相賀公捨此欲何

之乎裕還彭城勃勃進陷長安稱帝歸統萬

裕為相國宋公加九錫欲移晉祚以讖云昌明之後尚有

二帝乃使人縊安帝帝在位二十二年弟瑯琊王德文立

是為恭帝恭帝元熙元年魏泰常四年裕進爵為王加殊禮明

年至建康受禪是為宋高祖武帝晉帝降為零陵郡名屬湘州今

湖南永王已而被殺晉凡十五帝武帝惠帝懷帝愍帝元

帝明帝成帝康帝穆帝哀帝廢帝奕簡文帝孝武帝安帝恭帝百五十六年而亡

第三篇 南北朝

第一章 魏太武經營四方附南北分朝

宋武帝在位三年崩太子義符立義符親狎羣小遊戲無

度魏明元帝擊宋取青今山東東北境兗今山東西南境河南諸郡明元

崩太子燾立是為世祖太武帝義符在位二年司空徐羨

之等廢而弑之以義符弟宜都郡名屬荆州今湖北宜昌府王義隆素

有令望迎入即位是為太宗文帝文帝既立殺羨之等

魏太武帝鷲勇善用兵將士咸盡死力每戰輒勝夏主赫

連勃勃殂太子昌立太武自將伐夏克統萬昌走上邽縣名

天水郡及秦州治故城在甘肅秦州城西魏將追擒之昌弟平原王定自立於



平涼

縣名平涼郡治今甘肅平涼府治

宋文帝元嘉八年

魏太武帝神麌四年定擊

破西秦以其王乞伏慕末歸殺之又欲奪北涼地吐谷渾

王邀擊之執定獻於魏夏亡吐谷渾者慕容氏之支屬也

世保白蘭山

在甘肅西甯府徽外青海西南

至是并西秦故地燕王馮跋

殂弟弘立十三年

魏太延二年

魏伐燕弘奔高麗即高句麗而被殺

北燕亡十六年

魏五年

魏伐涼姑臧潰其王沮渠牧健降北

涼亡後又擊逐吐谷渾定河湟

今甘肅蘭州西甯二府

北狄一種有柔然者道武時起於漠北奪高車

匈奴別部居甘肅迪

化州鎮西府境內

之地而居之吞併諸部士馬繁盛雄於北方其

酋社崙自稱可汗與魏為敵國社崙死從弟大檀立太武

親征大敗之追至菟園水

在外蒙古賽因諾顏部內杭愛山南

分軍搜討諸

部降者數十萬落獲馬牛羊二百餘萬大檀憤悒而死後

其子吳提及孫吐賀真連為太武所敗自是柔然屏跡不

敢犯魏塞高麗及西域諸國皆朝貢於魏

魏司空崔浩博學有智略自明元時已為謀臣太武甚寵

任之嘗指浩以示屬國渠帥曰此人纖弱不能彎弓然胷

中所懷乃過於兵甲朕之武功皆此人所教也後命修國

史書先世事皆詳實僚吏勸浩刊其文於石立之衢路以

彰直筆北人忿恚譖浩暴揚國惡太武大怒案誅之

宋文帝欲大舉擊魏王玄謨等勸之沈慶之諫曰耕當問

奴織當問婢今欲伐國而與白面書生謀之事何由濟文

帝不聽元嘉二十七年魏太平真君十一年遣玄謨等出師取碣磝

城名在山東東昌府茌平縣西南進圍滑臺魏帝自將救之眾號百萬鞞

鼓之聲震天地玄謨懼退魏人追擊破之宋人欲斬玄謨

慶之止之曰佛狸威鎮天下控弦百萬豈玄謨所能當且

殺戰將以自弱非計也佛狸太武小字也太武引兵南下

臨江而還殺掠不可勝計所過郡縣赤地無餘春燕歸巢

於林下

魏中常侍宗愛險暴多不法太子晃惡之愛譖殺東宮官

屬晃以憂卒太武追悼不已愛懼誅弒帝立南安王余太武

庶子既而又弒余魏人立晃之子濬是為高宗文成帝執愛

族誅之太武經營四方國頗虛耗重以內難朝野楚楚文

成嗣以鎮靜懷集中外人心復安

晉八王亂後戎狄竊據北帶之地互相攘奪者百有餘年

漢及前趙劉氏夏赫連氏北涼沮渠氏匈奴也後趙石氏

羯也燕慕容氏西秦乞伏氏南涼禿髮氏鮮卑也前秦苻

氏後涼呂氏也後秦姚氏羌也謂之五胡成李氏據中

帶西境雖稱巴氏其實蠻也併五胡為六夷慕容氏前後

四國曰前燕後燕西燕南燕又有前涼張氏魏冉氏西涼

李氏北燕馮氏皆漢人也凡十五姓而為國十九然漢與

前趙一姓相承實一國也冉魏西燕建國甚短不足齒於  
列國故舊史以二趙前趙後趙四燕前燕後燕南燕北燕三秦前秦後秦西秦五  
涼前涼後涼南涼西涼北涼成夏稱為十六國劉石慕容苻姚五氏者  
五胡之雄也皆嘗主中原苻秦又於五氏中為最盛焉成  
二趙冉魏前燕前涼六國先於苻秦而亡二秦後秦西秦四燕  
後燕西燕南燕北燕及夏十一國皆後於苻秦而起  
及拓跋氏滅夏燕涼僭偽小國始盡絕蹤漢土分屬二大  
國宋因晉遺業有中南二帶即古吳越楚蜀之地也魏據  
有北帶即古秦晉燕齊之地也北謂南為島夷以其僻在  
海隅也南謂北為索虜以其俗以索辨髮也兩主各稱至  
尊而不相下號曰南北朝

第二章 宋齊篡弒相仍

宋帝義苻既以童昏被廢文帝嗣位二十餘年間號為小  
康及擊魏大敗所在罹兵燹邑里蕭條元嘉之政衰矣文  
帝在位三十年太子劭多過失數為帝所詰責使巫呪詛  
帝事覺帝擬廢之劭弒帝而自立劭帝武陵郡名屬郢州今湖南常德  
府王駿舉兵討劭宋人立駿是為世祖孝武帝劭戰敗被  
誅

孝武在位十一年崩太子子業立孝武疎忌骨肉多誅殺  
至子業尤甚畏忌諸父湘東郡名屬湘州今湖南衡州府王彧等拘於

殿內毆捶陵曳無復人理恣為不道中外騷然宋人弑之

而立彧是為太宗明帝子業弟晉安郡名屬江州今福建沿海地王子

勛自立於尋陽郡名屬江州今江西九江府明帝擊滅之遂殺孝武子

十餘人帝寢疾以太子幼弱深忌諸弟盡殺之惟桂陽郡名

屬湘州今湖南郴州桂陽州王休範以庸劣得全及病篤以休範為司

空與褚淵袁粲沈攸之等並受顧命淵薦蕭道成為右衛

將軍共掌機事明帝在位七年崩太子昱立年十歲休範

舉兵反攻建康蕭道成擊斬之

宋帝昱在位五年驕恣嗜殺鉞椎鑿鋸不離左右一日不

殺則慘然不樂中外惶懼蕭道成與袁粲褚淵謀廢立粲

沮之淵默然道成遂弑昱而立昱弟安成郡名屬江州今江西吉安府安

福縣及袁州府王準是為順帝袁粲謀誅道成褚淵以其謀告道

成粲父子被殺於石頭百姓哀之曰可憐石頭城甯為袁

粲死不作褚淵生沈攸之亦舉兵江陵討道成軍潰走死

道成為相國齊公加九錫尋進爵為王順帝在位二年禪

位於齊泣而彈指曰願後身世世勿復生天王家齊人殺

之而滅其族宋凡八帝武帝廢帝義苻文帝孝武帝廢帝子業明帝廢帝昱順帝六十

年而亡

齊王道成稱帝是為齊太祖高帝在位四年崩太子顛立

是為世祖武帝武帝在位十一年崩太子長懋已卒太孫

昭業立昭業狂昏好與羣小作諸鄙戲在位一年尚書令  
蕭鸞弑之而立昭業弟新安郡名屬揚州今浙江嚴州府西境安徽徽州府王昭  
文鸞自爲宣城郡名屬揚州今安徽甯國池州二府廣德州王昭文卽位未四  
月鸞又廢之而奪其位是爲高祖明帝明帝高帝之兄子  
也高帝養之恩過己子而武帝太子長懋惡之及明帝得  
志殺高武子孫殆無遺類

明帝在位四年崩太子寶卷立寶卷昏淫兇恣親信嬖倖  
屢誅大臣賊虐日甚太尉陳顯達舉兵襲建康敗死將軍  
崔慧景受命出討叛州還軍逼建康時豫州寄治歷陽今安徽和州  
刺史蕭懿將兵在近寶卷急召入援慧景敗死懿爲尚書

令

懿弟衍英達有器略爲雍州今湖北襄陽府刺史鎮襄陽知齊將

亂密修武備招聚驍勇衍使人勸懿行伊霍故事不爾亟

還歷陽懿不能用竟賜死衍起兵東下寶卷弟南康郡名屬江

州今江西贛州府王寶融稱帝於江陵是爲和帝以衍都督諸軍

衍進圍建康齊人弑寶卷而迎之寶卷在位三年追廢爲

東昏侯衍自爲相國梁公加九錫尋進爵爲王和帝至姑

孰禪位於梁在位僅一年梁人殺之齊凡七帝高帝武帝廢帝昭業

廢帝昭文明帝廢帝寶卷和帝二十四年而亡梁王衍稱帝是爲高祖武

帝

第三章 魏孝文尙文治

魏文成帝以宋帝子業景和元年魏和平六年崩太子弘立是爲顯祖獻文帝獻文卽位初宋邊帥多叛附於魏宋明帝遣將擊之大敗魏因取淮北地獻文聰睿夙成剛毅有斷而好黃老佛陀之學常有遺世之心嫡母馮太后猜忍多智獻文畏之皇子宏生太后自撫養之立爲太子獻文年甫十八傳位於宏自稱太上皇帝時宏生五年矣是爲高祖孝文帝太上徙居北苑采椽土階與禪僧共居焉然以孝文幼仍聽大政太后有所幸李奕太上由事誅之后怒鳩殺太上臨朝稱制後魏起夷狄專以刑殺爲政猗盧爲

代王用法甚嚴國人犯罪者或舉部就誅老幼相攜而行人問何之曰往就死無一人敢逃匿者道武誅人或夷五族其克劉衛辰也收宗黨五千餘人無少長盡殺之末年被疾刑罰濫酷明元承之吏文亦深太武命崔浩更定律令詔中書以經義決疑獄然如崔浩之誅同宗連姻盡赤其族僚屬僮吏百餘人皆戮死則亦仍父祖舊習也獻文上皇慎刑獄始減門房之誅非謀反大逆及外叛罪止其身馮太后稱制又詔五族者降止同祖三族者止一門門誅者止身及孝文親政尙文治不任威刑於是刑戮稍減

孝文性至孝事馮太后能承顏順志后崩帝哀毀過禮喪服一遵古制初后忌帝英敏欲廢之盛寒閉空室絕其食三日因大臣固諫乃止帝初無憾意又有宦者譖帝於后后杖帝數十帝默然受之及后崩亦不復追問

帝恭儉好學精勤政事日夕不倦均民田制戶籍作明堂辟雍靈臺修郊廟之禮定樂章正祀典養老於明堂親耕籍田凡先王禮制儒書所述者無不舉行世稱其有太平之風

帝惡國俗之陋欲遷都以變舊風恐羣臣不從乃詔大舉伐齊步騎三十餘萬自將至洛陽羣臣稽顙於馬前請停南征帝曰今者興發不小動而無成何以示後苟不南伐當遷都於此乃營洛都遂遷焉禁胡服禁胡語改國姓爲元氏諸功臣舊族自代來者姓多重複皆改之爲諸弟娶中州名族而使以前妻爲妾媵其所親任多中州儒生宗室勳舊不悅太子恂私著胡服欲奔還平城帝廢爲庶人尋賜死代人戀舊土有謀反者討平之蓋帝優於文學深慕華風欲興文治以比隆於三代故不欲僻處恆北也然南遷之後武事漸弛俗趨紛華國勢之衰實始於此矣

#### 第四章 魏衰亂

魏孝文帝以齊帝寶卷永元元年

魏太和二十三年

崩太子恪立

是爲世宗宣武帝宣武疎忌宗室嬖倖擅權魏政寢亂以  
梁武帝天監十四年魏延昌四年崩太子詡立是爲肅宗孝明  
帝時年六歲母胡氏爲太后稱制將軍張彝之子仲瑀上  
封事排抑武人於是喧謗盈路羽林虎賁近千人相率至  
尚書省詬罵以瓦石擊省門上下懾懼莫敢近討遂焚彝  
第曳彝父子毆捶投火中遠近震駭太后收其凶强者八  
人斬之餘不復治大赦以安之懷朔鎮在內蒙古烏刺武旗東北函使  
高歡至洛陽見張彝之死還家傾貲以結客或問其故歡  
曰宿衛相率焚大臣之第朝廷懼而不問爲政如此事可  
知矣財物豈可常守邪歡自先世徙北邊遂習鮮卑之俗

沈深有大志與侯景等相友善以任俠雄鄉里

胡太后妹婿元叉恃寵驕恣遂幽太后而專政貪吝虐民

北邊六鎮武川撫冥懷朔懷荒柔離叛太后誅叉而再臨

朝內嬖用事政刑縱弛盜賊蜂起封疆日蹙孝明寢長太

后自以所爲不謹務爲壅蔽母子嫌隙日深秀容故城在山西朔

平府朔州北境酋長爾朱榮討賊有功爲六州并肆汾唐恆雲大

都督高歡見榮勸舉兵清君側會太后鳩殺帝立宣武姪

孫釗榮乃舉兵至河陽縣名屬河內郡今河南懷慶府孟縣立孝文之姪長

樂王子攸是爲敬宗孝莊帝執胡后及幼主釗沈之河殺

王公以下二千餘人而還晉陽討劇賊葛榮平之自爲大



丞相得宇文泰愛其才以為統軍泰鮮卑宇文部之肩也  
孝文之姪北海王顥奔梁梁武帝立顥為魏王遣將送入  
洛陽莊帝奔河內榮渡河擊顥顥走死莊帝歸洛陽加榮  
天柱大將軍榮蓄不臣之志帝陰謀誅之榮入謁帝手刺  
之榮從弟世隆與榮弟兆共立宗室長廣郡名屬青州今山東萊州府平  
州王曄孝文之從祖弟兆入洛執莊帝還晉陽弒之使高歡統六  
鎮世隆又廢曄立孝文之姪廣陵王恭是為節閔帝歡起  
兵據鄴立宗室元朗擊爾朱氏破之入洛廢節閔及朗而  
立宣武之姪平陽王修是為孝武帝節閔及朗曄皆為孝  
武所殺歡為大丞相建府於晉陽居之

時賀拔岳都督關西二十州雍二華二岐三梁東益

原河渭七州今甘肅大半巴以夏州今陝西榆林府及內

益二州今四川保南府北境被邊要重表宇文泰鎮之岳為秦州刺史侯莫陳悅所殺

泰討悅誅之悉定秦隴孝武帝以泰為關西大都督帝畏

歡謀伐晉陽歡擁兵來帝奔長安依泰拜為大丞相歡追

帝不及乃立宣武姪孫清河世子善見於洛陽遷於鄴是

為孝靜帝魏自此分為東西二國先是熒惑入南斗梁武

帝以諺云熒惑入南斗天子下殿走乃跣而下殿以禳之

及聞魏帝西奔慚曰虜亦應天象邪孝武居長安半年又

與泰有隙遇醜而崩泰立宣武之姪南陽王寶炬是為文

帝高氏與宇文氏連年相攻戰互有勝負

第五章

侯景亂梁

附北齊代東魏

東魏高歡病篤謂世子澄曰侯景有飛揚跋扈之志非汝所能駕御堪敵景者唯慕容紹宗我故不貴之留以遺汝

景專制河南十餘年素輕澄及歡卒景舉河南十三州

二荆洛廣二陽襄潁南兗十一州今河南附於梁時梁與省大河以南兗濟二州今山東西南境

東魏和邊疆無事羣臣不欲納其叛臣嬖人朱异勸武帝

納之封河南王遣兄子貞陽侯淵明

蕭懿之子

督諸將擊東魏

高澄遣慕容紹宗拒戰敗之擒淵明遂討景景南走奪梁

壽陽據之梁就以爲南豫州牧澄求成於梁以閒景景遂

叛梁引兵渡江襲建康

梁武帝孝慈恭儉博學能文勤於政務早起視事身衣布

衣一冠三年深崇佛法長齋斷魚肉日止一食惟菜羹糲

飯而已屢捨身佛寺自稱三寶奴又疏簡刑法優假太過

姦吏招權弄法牧守多浸漁百姓在位四十八年江南久

無事武備廢弛及侯景逼臺城公私駭震援軍至者爲景

所敗太清三年

武帝四十八年魏文帝大統十五年東魏孝靜帝武定七年

景佯求和

武帝遣人與景盟以爲大丞相景攻陷臺城縱兵掠乘輿

服御宮人帝爲景所制飲膳亦被裁損憂憤成疾口苦索

蜜不得再曰荷荷而崩太子統仁孝好學早卒諡昭明帝

捨嫡孫而立統弟綱爲太子至是卽位是爲太宗簡文帝  
簡文既立受制於景而已

東魏高澄以大將軍秉政陰謀受禪爲其下所殺弟洋自  
爲丞相齊王逼靜帝禪位尋殺之東魏亡洋稱齊帝是爲  
顯祖文宣帝追尊歡及澄皆爲帝史謂之北齊以別於蕭  
齊

是時梁國大亂諸王據州郡互相攻擊湘東王繹鎮江陵

邵陵郡名屬湘州今湖南寶慶府王綸在江夏郡名屬郢州今湖北武昌府各自稱

假黃鉞都督承制皆簡文之弟也昭明太子之子岳陽王  
警鎮襄陽爲繹所攻遣使求援於西魏請爲附庸西魏立

警爲梁王繹襲取郢州今湖北武昌漢陽二府及湖南北境綸奔齊齊亦以

綸爲梁王魏兵攻殺之

簡文在位二年侯景廢而殺之立昭明太子之孫豫章王

棟已而廢棟自稱漢帝始興郡名屬湘州今廣東韶州府太守陳霸先

起兵討景進取江州繹以爲刺史繹又遣王僧辨伐景景  
篡立數月爲僧辨霸先所敗東走欲入海爲其下所殺送

尸建康僧辨傳首江陵截其手送於齊暴屍於市士民爭

取食之并骨皆盡繹自立於江陵是爲世祖孝元帝自景

之亂江北州郡入於東魏尋屬齊漢中蜀川亦爲西魏所

并梁之疆土略與孫吳相似

第六章

周代魏陳代梁

附北齊  
暴亂

魏宇文泰崇儒好古嘗舉蘇綽爲尚書綽性忠儉以濟民爲己任泰推心任之始制計帳戶籍之法後人多遵用之又爲六條詔書一曰清心二曰敦教化三曰盡地利四曰擢賢良五曰恤獄訟六曰均賦役令百司習誦之頒新制三十六條使刺史守令皆依之百姓便之晉氏以來文章競爲浮華泰欲革其弊命綽仿周書體作大誥宣示羣臣自是終宇文氏之世詔誥多依此體綽卒泰與羣公步送葬酹酒言曰爾知吾心吾知爾心方與其定天下遽捨吾去奈何舉聲慟哭不覺卮落於手泰以太師秉魏政文帝充位而已帝崩太子欽立密謀誅泰

泰廢而弒之立其弟齊王廓是爲恭帝

泰遣柱國于謹擊梁入江陵元帝焚古今圖書十四萬卷以寶劍擊柱折之歎曰文武之道今夜盡矣乃出降或問何意焚書曰讀書萬卷猶有今日尋被殺在位三年魏取襄陽徙梁王訥於江陵立爲梁帝屯兵守之是爲中宗宣帝稱臣於魏史謂之後梁

王僧辨陳霸先奉元帝子晉安王方智爲太宰承制齊文宣帝立蕭淵明爲梁王以兵納之僧辨奉歸建康以方智爲太子霸先殺僧辨廢淵明立方智是爲敬帝敬帝在位三年霸先爲丞相尋爲相國陳公遂篡位帝尋遇害梁凡

四世武帝簡文帝五十六年而亡霸先稱陳帝是為高祖

武帝在位二年崩兄子臨川郡名今江西撫州建昌二府王倩立是為

世祖文帝文帝在位七年崩太子伯宗立伯宗在位二年

叔父安成王頊廢之而自立是為高宗宣帝

初宇文泰以漢魏官繁命蘇綽等仿周禮更定六官至魏

恭帝三年梁敬帝太平元年齊文宣帝天保七年始行之泰為太師大冢宰

是歲卒世子覺襲職封周公時年十五從兄宇文護受泰

顧命輔之恭帝禪位於周明年梁太平二年十月以後陳武帝永定元年周孝閔帝

元年九月以後明帝元年齊天保八年周公覺稱天王追尊泰曰太祖文王

封魏帝為宋公尋殺之魏自道武稱帝至是十四世道武帝明

元帝太武帝文成帝獻文帝孝文帝宣武帝孝明帝凡百五十

九年而亡護封晉公為大冢宰周王惡護之專權密謀除

之護廢而弑之立王庶兄甯都公毓為天王尋稱帝是為

世宗明帝尊文王曰文帝明帝明敏有識量護憚之進毒

弑之弟魯公邕立是為高祖武帝

齊文宣帝嗜酒淫泆肆行狂暴每醉輒手殺人以為戲樂

諸王大臣冤死者眾又夷魏宗室二十五家收諸元七百

餘人盡殺之棄尸漳水文宣崩太子殷立叔父常山王演

廢殷而自立是為肅宗孝昭帝孝昭崩弟長廣王湛立是

為世祖武成帝武成淫虐不減於文宣傳位太子緯自稱

太上皇帝仍總大政太上崩緯亦昏亂嬖倖用事誅殺賢能齊政愈紊陳宣帝遣將擊齊取沿淮諸郡

第七章 周平齊隋代周并梁陳

周武帝深沈有遠識以晉公護秉政深自晦匿無所關預護自受太祖顧託擅威福者十有六年諸子僚屬皆貪殘恣橫武帝與弟衛公直等謀召護入手擊之護踣於地直出斬之帝始親政追尊廢王覺為孝閔帝叱奴太后崩帝行三年之喪素重儒學禁佛道二教毀諸淫祠政事嚴明稱為賢主

武帝聞齊國亂自將東伐取平陽取晉陽遂圍鄴齊帝高緯傳位於太子恆而出走周兵追獲之周興師未半年而悉平齊五十州齊凡六世文宣帝廢帝殷孝昭帝武成帝後主緯幼主恆二十八年而亡帝還長安獻俘於太廟封緯為溫公已而殺之夷其族

周宣政元年武帝十八年陳宣帝太建十年武帝崩太子贊立是為宣帝

立楊堅女為后堅父忠仕魏及周以功封隋公堅襲爵為

亳州今屬安徽總管堅相表奇異或嘗告武帝堅有反相

堅聞之深自晦匿及宣帝立以為大司馬

宣帝淫戲無度立未一年傳位於太子闡是為靜帝上皇驕侈彌甚自稱天元皇帝所居名天臺自比上帝令羣臣

朝者致齋天元崩靜帝幼沖近臣以楊堅有重名矯遺詔以堅輔政堅自爲大丞相假黃鉞進相國隋王加九錫尋受禪封靜帝爲介公周凡五世孝閔帝明帝武帝宣帝靜帝二十五年而亡隋王稱帝是爲高祖文帝文帝秉周政僅九月安坐而取二百餘州自古篡國之易未有如隋者也雖有周臣起兵匡復帝猶假周之國力不半歲殄滅之諸王數謀殺帝帝以次誅鋤及卽位遂夷滅宇文氏之族殆無遺種靜帝亦遇害

初蘇綽在西魏以國用不足爲征稅法頗重旣而歎曰今所爲者正如張弓非平世法也後之君子誰能弛之綽子威聞其言每以爲己任文帝徵威爲度支尙書威奏減賦役務從輕簡帝又命有司修正周法采魏晉以下律折衷之制五刑曰笞杖徒流死死刑二絞斬去前世梟轆及鞭法族罪止謀叛以上後世多遵用之又改官制除周六官復依漢魏之舊而加增損置吏民禮兵刑工六部尙書六部之稱自此始

初梁宣帝爲魏所立其所統數郡而已魏亡臣於周宣帝殂太子歸立是爲世宗孝明帝孝明時周亡復臣於隋孝明殂太子琮立隋帝廢梁國賜琮爵莒公後梁稱帝三十年而亡

陳宣帝在位十四年崩太子叔寶立叔寶耽佚遊起三高閣飾以珠玉與妃嬪狎客日夕酣歌政刑墮紊文武解體

隋開皇八年陳帝叔寶禎明二年下詔伐陳命皇子晉王廣督兵五

十萬自八道進叔寶聞之謂侍臣曰王氣在此彼何為者尙書孔範曰長江天塹虜軍豈能飛渡邪臣每患官卑虜

若渡江臣定為太尉公矣範常自謂文武才能舉朝莫及故敢大言也叔寶然之奏伎縱酒賦詩不輟明年隋將賀

若弼自廣陵濟江陳人不覺韓擒虎自橫江捕名在安徽和州城東南宵濟采石山名在安徽太平府城西北守者皆醉不能拒沿江諸戍望

風盡走擒虎入建康叔寶自投於井隋軍俘之以歸獻於太廟陳稱帝五世武帝文帝廢帝伯宗宣帝後主叔寶凡三十二年而亡自

晉元帝南渡江東相承者五代東晉宋齊梁陳凡二百七十三年始為北朝所并南北復歸於一



第四篇 隋

第一章 煬帝奢淫

隋文帝使太子勇參決政事時有損益帝皆納之勇率意任情行無矯飾獨孤后深惡之弟晉王廣彌自修飾媚事左右密爲奪宗之計使僕射楊素譖勇后遂勸帝廢勇爲庶人而以廣爲太子

帝性嚴峻令行禁止雖嗇於財賞功不吝自奉儉薄愛養百姓在位二十一年受禪之初民戶不滿四百萬末年已及九百萬然以詐術得國猜忌苛察信受讒言功臣故舊無終始保全者乃至子弟皆如仇敵

帝寢疾召太子廣入居殿中廣預擬帝崩後事為書問楊  
 素素答報宮人誤送帝所帝覽之大恚帝所寵陳夫人宣陳  
 女旦出更衣為廣所逼拒之得免帝怪其神色有異問故  
 夫人泣然曰太子無禮帝恚抵床曰畜生何足付大事獨  
 孤誤我將召故太子勇素聞之白廣令右庶子張衡入弑  
 帝其夜廣逼淫陳夫人廣即位是為煬帝遣人縊殺勇後  
 殺其八子弟漢王諒為并州今山西太原府總管發兵反帝遣楊  
 素討破之虜諒以歸殺之諒所部吏民坐死徙者二十餘  
 萬家

煬帝營建洛陽為東京今河南河南南府治役丁二百萬人作顯仁

宮在河南府宜陽縣東南發江南奇材異石又求海內嘉木異草珍

禽奇獸以實苑囿又發民百餘萬開通濟渠自西苑在河南

城西引穀洛水達於河引河入汴引汴入泗以達於淮又開

邗溝在江蘇揚州淮安二府境內今為運河之一部入江渠旁築御道自長安至

江都縣名江都郡治晉廣陵縣今江蘇揚州府治置離宮四十餘所充以美女

遣人往江南造龍舟及雜船數萬艘以備遊幸之用築西

苑廣數里其內為海起三神山臺觀殿閣羅絡山上北有

渠縈紆注海緣渠作十六院皆以夫人主之窮極華麗宮

樹凋落則翦綵為花葉綴之沼內亦翦綵為荷芰菱芡色

渝則易之好以月夜從宮女數千騎遊西苑作清夜遊曲

馬上奏之

後又發民百餘萬開永濟渠今名衛河引沁水南達於河北通

涿郡今直隸順天府丁男不給兼役婦人又鑿太行山通馳道築

長城於西北二邊營晉陽汾陽二宮晉陽宮在山西太原府太原縣北汾陽宮

在山西忻州靜樂縣北又穿江南河今為浙西運河自京口至餘杭郡名今浙江杭

州帝或幸東京或遊江都或北巡長城或西抵河右營造

巡遊無虛歲嘗帥大軍泝金河在山西歸化城南西南入黃河幸突厥北狄

國名詳見第七篇啟民可汗帳賦詩曰呼韓頓頽至屠耆接踵來

何如漢天子空登單于臺徵四方散樂悉集東京諸蕃來

朝陳百戲於端門外以示之執絲竹者萬八千人自昏達

旦終月而罷費鉅萬歲以為常

第二章 隋國分崩

煬帝南平林邑南亞細亞國名今安南國南境西克吐谷渾皆郡縣其地

遣兵攻琉球虜其民而還又徵高麗王元入朝不至大業

七年下詔親征高麗徵國內兵會涿郡敕河南淮南江南

造戎車五萬乘供載衣甲幔幕發河南北民夫以供軍須

發江淮以南民夫及船運黎陽縣名屬汲郡今河南衛輝府濬縣倉城在縣西南

洛口倉城在河南府鞏縣東諸倉米舳舻相次二百里往還常數十

萬人晝夜不絕死者相枕舉國騷動重以官吏侵漁百姓

窮困始相聚為羣盜八年師發涿郡凡一百十三萬餽運

者倍之首尾亘百餘里帝渡遼河攻遼東城

漢故郡治自晉末屬高麗

故城在盛京奉天府遼陽州北不克諸軍進渡鴨綠江大敗而還九年再

徵兵親征攻遼東亦不克蒲山公李密少有才略輕財好

士嘗乘黃牛讀漢書楚公楊素遇而奇之素子玄感與密

為深交素卒玄感潛謀作亂至是督運黎陽遂率運夫反

引密為謀主圍東都帝引軍還遣將討之玄感兵敗走死

密被逮伺守者懈逸去

十年帝復征高麗次懷遠鎮

在直隸承德府朝陽縣西

高麗王元遣使

乞降帝還西京徵元入朝元竟不至已而帝如東都如汾

陽巡北邊又如江都巡遊仍不止使代王侑留守西京越

王侑留守東都二王皆元德太子昭之子也

十二年羣盜翟讓等起於河南李密往從之攻掠郡縣十

三年

恭帝侑義甯元年

擊敗東都兵讓推密為主號魏公修洛口

城據之略取河南諸郡是時豪傑竊據四方隋國分崩鄆

陽

郡名今江西饒州府

賊帥林士弘稱楚帝據江南東海

郡名今江蘇海州

李子通據海陵

縣名屬江都郡今江蘇揚州府泰州

章邱

縣名屬齊郡今山東濟南府

杜伏威據歷陽

縣名歷陽郡治今安徽和州

河北多盜漳南

縣名屬清河郡故城在山

東東昌府

恩縣西北

竇建德最大稱長樂王據樂壽

縣名屬河間郡今直隸河間府

縣馬邑

郡名今山西朔平大同二府

校尉劉武周朔方

郡名後魏夏州今陝西榆林府

鄆將梁師都各據郡反附於突厥突厥立武周為定楊可

汗武周自稱帝取樓煩今山西忻州靜樂縣定襄今內蒙古

城土默雁門今山西諸郡師都取雕陰今陝西弘化今甘肅

陽延安今陝西等郡稱梁帝突厥與以可汗號金城郡名

肅蘭校尉薛舉據隴西稱西秦霸王尋稱秦帝武威司馬

李軌據河西稱涼王後稱帝後梁宣帝曾孫蕭銑據巴陵

縣名巴陵郡治今湖南岳州府治稱梁王後稱帝徙都江陵

### 第三章 唐定禍亂

唐公李淵者晉西涼公暉七世孫也祖虎仕魏有功封隴

西公父昉於周世封唐公淵襲爵煬帝嘗以淵為弘化留

守御眾寬簡人多附之四方盜起帝以淵為山西河東撫

慰大使討捕羣盜多捷尋為太原郡名今山西留守突厥數

侵邊詔淵擊之

淵次子世民聰明勇決識量過人見隋室方亂陰有濟世

安民之志與晉陽令劉文靜及宮監裴寂相結文靜謂世

民曰今主上南巡羣盜萬數當此際有真主驅駕而用之

取天下如反掌耳太原百姓收拾可得十萬人尊公所將

之兵復數萬以此乘虛入關號令天下不過半年帝業成

矣世民笑曰君言正合我意乃陰部署賓客而淵不知也

會淵兵拒突厥不利淵恐獲罪世民乘閒說曰順民心興

義兵轉禍為福淵大驚曰汝安得為此言吾今執汝告縣

官世民徐曰世民觀天時人事如此故敢發言必欲執告不敢辭死淵曰吾豈忍告汝慎勿出口明日復說曰人皆傳李氏當應圖讖故李金才無故族滅大人若能盡賊則功高不賞身益危矣惟昨日之言可以救禍願勿疑淵歎曰吾一夕思汝言亦大有理今日破家亡身亦由汝化家爲國亦由汝矣

先是裴寂私以晉陽宮人侍淵淵從寂飲酒酣寂曰二郎陰養士馬欲舉大事正爲寂以宮人侍公恐事覺并誅耳煬帝以淵不能禦寇遣使者執詣江都世民與寂等復說曰事已迫矣宜早定計且晉陽士馬精強宮監蓄積巨萬

代王幼冲關中豪傑並起公若鼓行而西撫而有之如探囊中物耳淵乃募兵遠近赴集遣使於突厥借其援

淵使世子建成及世民擊西河郡名今山西汾州府拔之執郡丞高

德儒世民數其佞諛斬之自餘不戮一人秋毫無犯淵進

兵取臨汾今山西平陽府絳郡今山西絳州濟河而西遣建成守潼關

世民徇渭北關中吏民及羣盜爭歸之淵合諸軍圍長安

旬日拔之立代王侑爲帝遙尊煬帝爲太上皇淵自爲大

丞相唐王大業十四年恭帝侑義甯二年恭帝侗皇泰元年唐高祖武德元年加九

錫受禪於侑稱帝是爲唐高祖神堯皇帝立建成爲皇太

子世民爲秦王奉侑爲鄴國公是歲秦主薛舉殂子仁果

立世民破秦降仁杲歸殺之

煬帝至江都荒淫益甚酒厄不離口見中原已亂無心北歸欲保江東從駕多關中人思歸遂謀叛以許公宇文化及為主夜引兵入宮縊殺之宗室外戚無少長皆死惟存帝姪秦王浩立為帝化及自稱大丞相擁眾而西魏公李密據鞏洛鞏縣名屬河南郡今屬河南府洛即洛口城以拒之化及北走鳩殺浩自稱許帝煬帝凶問至東都隋留守官奉越王侗即位是為皇泰帝諡先帝曰世祖明帝謂之煬者依唐之追諡也王世充在東都屢與李密戰遂大敗之密走降於唐唐高祖遣密收撫山東密叛去唐人獲而斬之

長樂王竇建德取河北諸州改國號曰夏明年隋皇泰二年擊破許主宇文化及於聊城縣名屬武陽郡今山東東昌府治執而殺

之與王世充結好奉表於隋隋仍封為夏王隋帝侗立一年世充廢之而自稱鄭帝尋殺侗諡曰恭帝及鄴公楊侑

卒唐亦諡恭帝故隋末有二恭帝隋凡四帝文帝煬帝恭帝侑恭帝侗三十九年而亡夏王建德聞世充自立乃絕之始用帝制

唐帝遣人詐仕涼主李軌襲執以歸殺之河西平定楊可

汗劉武周遣其將宋金剛取唐河東諸州唐武德三年秦

王世民擊金剛大破之金剛及武周皆走死世民擊鄭鄭

主世充求救於夏四年世民圍洛陽夏王建德救鄭世民

大破擒之世充出降世民還長安獻俘太廟斬建德於市  
赦世充尋爲人所殺帝又遣族子趙郡王孝恭及李靖擊  
江陵梁主蕭銑出降送長安殺之李靖度南嶺悉平嶺南  
建德故將劉黑闥起兵漳南復夏舊境稱漢東王爲世民  
所破後其將執降於唐殺之

先是武康

縣名屬吳郡今屬浙江湖州府

沈法興據毘陵

縣名毘陵郡治今江蘇常州府

治

稱梁王李子通取江都稱吳帝杜伏威以歷陽附於唐

唐封爲吳王子通敗梁兵取其地伏威使輔公祐攻之子  
通敗走襲法興法興走死伏威後又擊子通執送長安五  
年入朝留輔公祐守丹陽是時楚主林士弘已衰及死其  
眾自散六年公祐反稱宋帝七年趙郡王孝恭討斬之江  
南平於是僭偽皆亡惟梁師都猶存至太宗皇帝貞觀二  
年乃爲唐所滅



第五篇 唐上

第一章 李世民擅殺兄弟

唐高祖之起晉陽也皆秦王世民之謀高祖謂世民曰事成當以汝爲太子將佐亦以爲請世民固辭而止李密降唐初見高祖猶有傲色及見世民不覺驚服退而歎曰眞英主也世民提兵戰無不勝破薛仁果走劉武周擒竇建德降王世充高祖以世民功大特置天策上將位在王公上以世民爲之開府置官屬

世民以國內寢平開館以延文學之士杜如晦房玄齡虞世南褚亮姚思廉陸德明孔穎達等十八人並以本官兼

文學館學士分爲三番更日直宿世民暇日輒至館中討論文籍或至夜分使閤立本圖像褚亮爲贊號十八學士士大夫得預其選者時人謂之登瀛洲

皇太子建成好酒色遊畋弟齊王元吉驕侈多過失而世民功名日盛建成內不自安乃與元吉協謀共傾世民高祖多內寵二人曲意諂事諸妃嬪世民獨不事之由是妃嬪皆譽二人而短世民高祖惑之猜嫌益甚

武德九年建成元吉欲害世民房玄齡杜如晦長孫無忌尉遲敬德等勸世民殺建成元吉力請乃決於是密奏兄弟專欲殺臣似爲世充建德報讎明日帥兵伏玄武門建成元吉入覺有變欲還世民追射建成殺之尉遲敬德射殺元吉建成元吉諸子皆被殺高祖立世民爲太子國事委太子處決然後聞奏初東宮官屬魏徵常勸建成早除世民及是世民召徵責以離間兄弟徵舉止自若對不屈世民禮之王珪亦嘗爲建成謀皆以爲諫議大夫高祖尋自稱太上皇詔傳位於太子太子卽位是爲太宗文武皇帝

## 第二章 太宗之治

太宗初立與羣臣語及教化曰大亂之後民未易化也魏徵曰不然久安之民驕佚難教經亂之民愁苦易化封德

舜曰三代以還人漸澆訛故秦任法律漢雜霸道蓋欲化而不能豈能之而不欲邪徵曰五帝三王不易民而化湯武皆能身致太平豈非承大亂之後邪帝卒從徵言或請重法禁盜帝曰當去奢省費輕徭薄賦選用廉吏使民衣食有餘自不爲盜安用重法邪貞觀元年關內唐十道饑二年諸道蝗三年大水帝勤而撫之民未嘗嗟怨四年全國大稔米價甚賤終歲斷死刑纔十九人史稱海內升平路不拾遺外戶不閉商旅野宿焉時封德彝旣死帝曰魏徵勸我行仁義今旣效矣惜不使德彝見之

唐雅樂有七德九功舞七德舞者本名秦王破陳樂太宗

破劉武周時所作也百餘人被銀甲執戟而舞以象武功九功舞者童子八佾冠進德冠舞蹈安徐以象文德魏徵欲帝偃武修文每侍宴見七德舞輒俛首不視見九功舞則諦觀之帝常自以驕侈爲懼首放宮女三千餘人嘗曰人主惟一心攻之者眾或以勇力或以辨口或以詔諛或以姦詐或以嗜欲輻湊各求自售人主少懈而受其一則危亡隨之此其所以難也嘗問侍臣創業守成孰難房玄齡曰草昧之初羣雄並起角力而後成之創業難矣魏徵曰自古帝王莫不得之於艱難失之於安逸守成難矣帝曰玄齡與吾共取天下出百死得一生故知創業之難徵

與吾共安天下常恐驕奢生於富貴禍亂生於所忽故知  
 守成之難然創業之難往矣守成之難方與諸公慎之  
 帝雖以武功定禍亂終以文德致治平崇儒好學置弘文  
 館聚四部書二十餘萬卷精選文學之士虞世南褚亮等  
 以本官兼學士聽朝之隙引入內殿講論前言往行商榷  
 政事取三品以上子孫充弘文館學生數幸國子監大徵  
 名儒為學官學生能明一經以上者皆得補官增築學舍  
 千二百間增學生滿三千餘員自屯營飛騎亦給博士授  
 經有能通經者聽得貢舉於是四方學者雲集京師乃至  
 高麗百濟新羅三國皆見高昌西域國名漢車師前部吐  
番今西諸君長亦遣子弟請入國學升講筵者至八千餘  
 人帝以師說多門章句繁雜命孔穎達與諸儒定五經疏  
 謂之正義

初房玄齡杜如晦仕秦府時府僚多補外官如晦亦出玄  
 齡謂太宗曰餘人不足惜杜如晦王佐之才大王欲經營  
 四方非如晦不可太宗即奏留之使參謀帷幄剖決如流  
 太宗每令玄齡入奏事高祖曰玄齡為吾兒陳事雖隔千  
 里皆如面談太宗既立以玄齡如晦為左右僕射總領六  
 部王珪為侍中統門下魏徵以秘書監參預朝政玄齡謀  
 事必曰非如晦不能決及如晦至卒用玄齡策蓋玄齡善

謀如晦善斷二人同心徇國故唐世稱賢相推房杜焉史家贊曰玄齡佐太宗凡三十二年然無跡可尋太宗定禍亂而房杜不言功王魏善諫諍而房杜讓其賢英衛善將兵而房杜行其道理致太平善歸人主爲唐宗臣固宜哉王魏者王珪魏徵英衛者英公李世勣衛公李靖也

帝自知神采爲臣下所畏常溫顏接羣臣導人使諫賞諫者以來之魏徵最善諫前後數十疏貞觀十三年徵上疏陳帝之志業比貞觀初漸不克終者十條帝深獎歎十七年徵卒帝曰以銅爲鏡可正衣冠以古爲鏡可見興替以人爲鏡可見得失徵沒朕亡一鏡矣自製碑文書石是歲

又命畫功臣於凌煙閣長孫無忌趙郡王孝恭杜如晦魏徵房玄齡高士廉尉遲敬德李靖蕭瑀柴紹侯君集虞世南李世勣等二十餘人

太子承乾不才弟魏王泰多能有寵潛有奪嫡之志侯君集負功怨望以承乾暗劣欲乘釁圖之因勸之反事覺廢爲庶人君集坐誅泰亦以險詐不立皇后兄長孫無忌力勸帝立泰弟晉王治爲太子

魏徵嘗薦君集君集誅帝始疑徵阿黨又有言徵自錄前後諫辭以示起居郎褚遂良者帝愈不悅徵臨終帝面指公主欲以妻其子至是罷其婚路所撰碑後又征高麗無

功歎曰魏徵若在不使我有此行也命馳驛祠徵復立所  
路碑

第三章 太宗威加四夷

武德末突厥頡利可汗與其姪突利可汗大舉侵唐至幽  
州屬關內道今屬陝西高祖命太宗拒之突厥嘗與唐和親太宗帥  
百騎馳詣敵陳責其負約且曰我秦王也可汗能鬪獨出  
與我鬪頡利笑而不應又遣人說突利以利害突利聽命  
頡利使突利與盟而還

太宗初立頡利與突利合十餘萬騎入涇州屬關內道今屬甘肅頡  
利進至渭水便橋在陝西西安府咸陽縣東南之北太宗自與高士廉

房玄齡等六騎徑詣渭水上與頡利隔水而語責以負約  
突厥大驚皆下馬羅拜俄而諸軍繼至旌甲蔽野頡利懼  
請盟而退貞觀二年遣柴紹等擊朔方梁師都突厥救之  
紹等大破突厥兵進圍師都其下殺之以城降四年遣李  
世勣李靖柴紹等擊突厥靖襲破頡利於陰山頡利遁走  
別將擒之以獻諸部皆降時突利先已入朝帝處突厥降  
眾東自幽州屬河北道今直隸順天府西至靈州屬關內道今屬甘肅甯夏府分突  
利地為四州順化長分頡利地為六州以突利為順州故城在直隸承德府東境土默特右翼界內都督頡利為右衛大將軍諸酋長至者  
皆拜官布列朝廷五品以上百餘人

當是時大唐威振四夷東北諸夷契丹奚霫以上三種皆東胡別種居

幽州營州之北今直隸室韋契丹別種居契丹靺鞨東夷

承德府及內蒙古東部蓋亦東胡別種居今黑龍江省靺鞨種名

契丹東今吉林省數十部西夷伊吾今甘肅鎮西府哈密

之党項西羌別種居吐谷渾廳時西突厥種落居

南今青海東南部諸部皆內附遠方諸國朝貢

相踵唐以伊吾置伊州開党項為十六州苗裔諸蠻之地

亦多設州四夷君長詣闕請帝為天可汗帝曰我為大唐

天子又下行可汗事乎羣臣四夷皆稱萬歲是後璽書賜

西北君長皆稱天可汗帝嘗奉太上皇置酒未央宮上皇

命頡利可汗起舞又命嶺南蠻酋馮智戴詠詩笑曰胡越

一家古未有也

吐谷渾數侵西邊九年遣李靖侯君集等擊破之可汗伏

允走死詔復其國以伏允子慕容順為可汗順死子諾曷

鉢立十年遣子弟入侍吐番在吐谷渾西南自古未通中

國唐初國勢寢強其王稱贊普贊普棄宗弄讚有勇略四

鄰畏之太宗遣使慰撫之弄讚奉表求婚帝未之許弄讚

發兵擊破吐谷渾党項進攻松州屬隴右道今四川松潘廳十二年遣

侯君集等擊破之弄讚懼謝罪因復請婚高昌王麴文泰

多遏絕西域朝貢又與西突厥共擊伊吾及焉耆西域國名今回

疆喀喇沙爾焉耆詠之十四年遣侯君集等擊滅高昌西突厥

葉護以可汗浮圖城在高昌西北漢車師後部今甘肅迪化州降以高昌地為

西州浮圖城為庭州置安西都護府於交河城高昌屬城漢車師前

王舊治今新疆吐魯番廳留兵鎮之十五年以宗女嫁吐番弄讚大喜

遣子弟入國學

十八年帝親征高麗褚遂良諫不聽明年渡遼水克遼東

城降白巖城故城在盛京奉天遼陽州東北進攻安市城故城在奉天府蓋平縣東

北大破其救兵於城下安市城險兵精堅守不下議者欲

拔烏骨城在安市市東南近大海渡鴨綠水直取平壤高麗國都今置府屬平安道

長孫無忌謂親征異於諸將不可乘危帝以遼左早寒士

馬難久留且糧將盡勅班師是行欲一舉滅高麗不能成

功帝深悔之

二十年遣李世勣等擊薛延陀匈奴別種勒諸部之一居突厥故地降之

帝自詣靈州招諭勅勒諸部回紇等十一姓回紇拔野古同羅僕骨多

濫葛思結阿跌契苾跌結渾斛薛各遣使歸命乞置官司詔曰朕聊命偏

師逐擒頡利始弘廟略已滅延陀鐵勒即勒百餘萬戶請

為州郡混元以降殊未前聞宜備禮告廟仍頒示普天帝

為詩曰雪恥酬百王除兇報千古勒石於靈州明年以勅

勒諸部為六都督府七州以其酋長為都督刺史置燕然

都護府在北河之北今内蒙古烏喇忒部西境以統之

二十二年遣王玄策使印度有一國王發兵攻玄策玄策

遁抵吐番西境徵吐番及泥婆羅吐番屬國在吐番之西今後藏界內之兵



進擊破之擒其王以歸又遣阿史那社爾汗利可等擊破

龜茲西域國名今西域震駭二十三年遣高侃擊突厥餘

眾是歲太宗崩高宗永徽元年侃追車鼻可汗擒之於金

山在外蒙古賽於是突厥諸部盡為內臣置府州二十有

餘以單于都護府治雲中即後魏盛樂之地統之其後遣蘇定方等擊

破西突厥獲沙鉢羅可汗龜茲國亂遣楊胄討平之徙安

西都護治焉遂以吐火羅漢大月氏苗裔居拔克特

大月氏別種居吐火羅東今巴達克山地罽賓在噶嚨南今印度波斯漢時怕

在吐火羅西北境等十六國置府州八十有餘竝隸安西府

又徙燕然都護府於回紇後改名安北統積北諸府州與

單于都護以積為界又滅百濟以其地置五都督府遂平

高麗以其地為九府四十二州置安東都護府於平壤以

統之尋以高麗餘眾復起徙治遼東又改交州都督府曰

安南都護府至則天武氏時置北庭都護府於庭州

夷狄之為中國患也固由野性難馴不知禮教而歷代綏

御乖方亦有以召戎而啟侮惟太宗既長武略復善撫綏

故四夷皆畏而愛之貞觀初中國三百餘州分為十道曰

關內今陝西終南山以河南今河南山東二省河東今山

河北今直隸省及河南北山南今陝西終南山以南及河

東北今甘肅省及淮南今河南光州湖北東境江南今

境隴右今甘肅省及淮南今河南光州湖北東境江南今

南湖北之大江以南及浙江福建劍南今四川嶺南今兩廣及

江西湖南貴州五省四川西陽州之安南猶古九州也其後蠻夷內屬者即其部落為羈縻府

州多至八百統於都護及邊州都督安東都護府屬河北道鎮東夷安北單于二府屬關內道鎮北狄安西北庭二

府屬隴右道鎮西域及北狄安南府屬嶺南道鎮南海威令所及縱橫千餘里東踰鴨綠江西跨温都固斯山在阿

國北南盡林邑北至骨利幹勅勒一部於諸部為最遠自境

第四章 武韋之禍附玄宗再定內難

太宗有疾謂太子治曰李世勣才知有餘然汝與之無恩

我今黜之我死用為僕射親任之若徘徊顧望則當殺之耳乃左遷疊州屬隴右道故城在都督世勣受詔不至家

而去帝嘗作帝範十二篇以賜太子曰修身治國盡在其中一旦不諱更無所言矣帝在位二十三年崩太子即位

是為高宗天皇大帝舅長孫無忌與褚遂良受遺詔輔政召李勣為左僕射尋為司空勣即世勣避太宗諱去世字

太宗才人武氏故荊州都督士護之女也年十四太宗聞其美召入後宮太宗崩才人年二十六與羣妾為尼會高

宗皇后王氏與蕭淑妃爭寵密令武氏蓄髮勸高宗納之既入后與淑妃皆失寵永徽六年高宗欲廢后而以武氏

代之佞臣許敬宗李義府贊之褚遂良不可帝以問李勣  
勣曰此陛下家事何必更問外人遂立武氏爲皇后王蕭  
皆遇害遂良貶而死武后以長孫無忌不助己深怨之令  
敬宗誣以謀反削官竄黔州屬江南道今四川西陽州彭水縣尋殺之籍  
沒其家

高宗苦風眩不能視百司奏事或使武后決之后性明敏  
涉獵文史處事皆稱旨由是委以政事權與人主侔上元  
元年高宗二十五年帝稱天皇后稱天后時人謂之二聖帝在位  
三十四年政在中宮者二十五年矣自褚遂良等死後羣  
臣無敢諫者李善感因事一諫人以爲鳳鳴朝陽

初高宗以賤妻子忠爲太子武后廢之立所生子弘弘仁  
孝中外屬心忤后意后醜之立其次曰賢又以事廢之而  
立其次哲高宗崩哲卽位是爲中宗皇帝尊天后爲皇太  
后立妃韋氏爲皇后中宗卽位二月太后廢爲廬陵王而  
立其弟豫王旦是爲睿宗皇帝太后臨朝稱制殺故太子  
賢遷中宗於房州屬山南道今湖北鄖陽府南境追王武氏祖考英公李  
敬業故勣之孫起兵揚州令文士駱賓王作檄排擊武氏極其  
醜詆太后遣將擊平之高宗弟越王貞又舉兵匡復不克  
而死太后遂殺唐宗室貴戚數百人自名嬰號聖神皇帝  
改國號曰周以睿宗爲皇嗣賜姓武氏立武氏七廟追尊

周文王爲始祖時墨年六十七矣

墨素知人心不服欲立威以拊制國人盛開告密之門縱酷吏周興來俊臣邱神勣等起大獄鍛鍊羅織率以反逆誣人大臣誅滅者數百家其殘忍好殺古今希見其比然有權略善用人賢才亦競爲之用徐有功仁恕執法墨敬憚之將相多得人魏元忠婁師德狄仁傑姚崇皆名相宋璟亦顯於朝師德沈厚寬恕仁傑之入相師德實薦之而仁傑不知每毀師德墨語仁傑曰朕之用卿師德所薦也仁傑退而歎曰婁公盛德我爲所容久矣

墨姪武承嗣武三思營求爲太子仁傑從容言於墨曰文

皇帝櫛風沐雨親冒鋒鏑以定天下傳之子孫大帝以二子託陛下今乃欲移之他族無乃非天意乎且姑姪與母子孰親陛下立子則千秋萬歲後配食太廟立姪則未聞姪爲天子而耐姑於廟者也墨稍悟仁傑又勸召還廬陵王墨遂召中宗於房州立爲太子以睿宗爲相王

墨信重仁傑稱爲國老而不名仁傑好面折廷爭墨每屈意從之仁傑卒墨泣歎姚崇桓立範敬暉等數十人皆仁傑所薦或曰天下桃李悉在公門矣仁傑曰薦賢爲國非爲私也墨嘗問仁傑曰欲得一佳士用之誰可者仁傑曰有張柬之者雖老宰相才也後竟用爲相

璽初嬖僧懷義已而惡其驕恣殺之後嬖張易之昌宗兄

弟璽年老政事多委之二張勢傾朝野神龍元年武璽篡位十六

年中宗復位元年璽疾甚張柬之與崔玄暉敬暉桓玄範袁恕己

率羽林將軍李多祚等舉兵討內亂迎中宗於東宮斬關

入斬易之昌宗於廡下中宗即位上璽尊號曰則天大聖

皇帝是歲崩年八十二則天立睿宗而稱制者七年易唐

為周者十五年

中宗在房州欲自殺韋妃每止之中宗與私誓曰異時幸

復見天日當惟卿所欲不相禁禦及復位妃復為皇后帝

每臨朝后必施帷幔坐殿上預聞政事如武后在高宗之

世帝愛女安樂公主適武三思之子三思以是得入宮禁

帝遂與之圖議政事張柬之等五人皆受制三思與韋后

通共譖五人皆賜王爵而罷政已而遠竄殺之安樂公主

負勢驕橫賣官鬻獄宰相以下多出其門太子重俊非后

所生后及三思等惡之重俊與李多祚等發羽林兵殺三

思父子入犯宮敗死景龍四年中宗復位六年七月人有

以後睿宗景雲元年上言皇后淫亂帝面詰之其人不屈中書令宗楚客矯制

撲殺之帝意怏怏后及其黨始懼焉秦客楊均皆幸於后

恐事泄安樂亦欲后臨朝以己為皇太女乃相與謀於餅

餒中進毒帝在位六年而遇弒帝妹太平公主草遺制立

皇子重茂是爲殤帝韋后爲太后攝政睿宗之子隆基密謀匡復厚結羽林豪傑起兵討亂斬韋后及安樂并其黨皆殺之廢殤帝奉睿宗立之睿宗重祚立隆基爲太子睿宗以姚崇宋璟爲相二人協心革弊政進忠良退不肖賞罰盡公紀綱修舉太平公主於誅二張誅韋氏時皆有英武欲易之賴姚宋等感悟帝意太子得無變然姚宋由是被貶帝在位二年傳位太子仍總大政太子立是爲玄宗皇帝世謂之明皇太平依上皇之勢擅權用事文武大半附之開元元年玄宗卽位二年陰謀廢立玄宗與近臣定計收

太平之黨盡斬之太平母子皆賜死上皇自是不預政後三年崩

### 第五章 開元之政

玄宗親政勵精圖治召姚崇爲紫微令崇吏事明敏裁決如流帝專任之崇由事辭相薦宋璟自代璟爲黃門監務在擇人隨材授任刑賞無私敢犯顏直諫帝甚敬憚之崇璟相繼爲政崇善應變成務璟善守法持正二人志操不同然協心輔佐使賦役寬平刑罰清省百姓富庶開元之政比隆於貞觀故唐世賢相前稱房杜後稱姚宋他人莫得比焉二人每進見帝輒爲之起去則臨軒送之

開元八年玄宗九年宋璟由微過而罷蓋帝外雖重璟心實厭之也是後在相位者率皆常才宇文融善言財利然徒勞擾百姓事多不就惟韓休張九齡俱以直著焉休同平章事帝或宴遊小過輒謂左右曰韓休知否言終諫疏已至左右曰休為相陛下殊瘦於舊帝歎曰吾雖瘦天下肥矣為相數月而罷九齡為中書令

玄宗所用之相姚崇尚通宋璟尚灑張嘉貞尚吏張說尚文李元絃杜暹尚儉韓休張九齡尚直各其所長也九齡既去自是朝廷之士容身保位無復直言

帝即位初患風俗奢靡焚珠玉錦繡於殿前禁后妃以下皆不得服之在位已久漸肆奢慾九齡每事爭之二十四年帝聽武惠妃則天后之從孫之讒欲廢太子瑛及二皇子鄂王瑤王琚九齡力諫帝不悅九齡坐事罷李林甫代之明年帝遂殺三子

林甫柔佞多狡數深結宦官及妃嬪家迎合上意以固寵杜絕言路掩蔽聰明嘗語諸諫官曰不見立仗馬乎一鳴輒斥去性陰險妒賢嫉能人以為口有蜜腹有劍屢起大獄誣陷異己在相位十九年養成國亂而帝不悟也

第六章 安史之亂附吐蕃回紇之寇

玄宗天寶元年即位三十一以安祿山為平盧節度使治營州祿

山本營州

屬河北道今內蒙古土默特地

雜胡與同里史思明相愛俱以

驍勇聞祿山傾巧善事人帝左右至營州祿山皆厚賂左

右譽之帝以為賢故授以節鎮三年兼范陽節度使

治幽州

初武惠妃卒帝悼念不已後宮數千無當意者或言壽王妃楊氏之美壽王者帝子瑁也帝為瑁別娶而納楊氏嬖之號太真四年冊為貴妃寵遇無比舉族皆貴盛從祖兄釗以善樗蒲得幸判度支事務聚斂屢奏帑藏充牣古今罕傳帝帥羣臣觀之由是視金帛如糞土賞賜無限賜釗名國忠

九年賜祿山爵東平郡王兼河北道採訪處置使祿山入

朝帝為之起第窮極壯麗日遣諸楊與之遊宴祿山體肥大帝嘗指其腹曰此胡腹中何所有對曰有赤心耳祿山請為貴妃兒帝與妃坐祿山先拜妃帝問其故對曰胡人先母而後父帝悅祿山生日賜與甚厚後三日召入妃以錦繡為大襁褓裹祿山使宮人以綵輿舁之帝聞歡笑聲問故左右以貴妃洗祿兒對帝賜妃洗兒金銀錢盡歡而罷自是出入宮掖頗有醜聲帝不疑

祿山求兼河東節度使

治太原府

帝從之是時李林甫專政武

備墮弛祿山既兼領三鎮有輕唐之志歸范陽

郡名即幽州

養

壯士聚兵仗為自強之計十一年林甫卒楊國忠為相祿



山素蔑視國忠由是有隙國忠言祿山必反且曰試召之必不來十三年祿山聞召即至帝加左僕射使歸十四年祿山請以蕃將代漢將帝猶不疑又表請獻馬三千匹每匹二人執鞚二十二將部送帝始疑之遣使止其獻祿山踞牀不拜曰馬不獻亦可十月當詣京師使還亦無表是冬遂反發所部兵及奚契丹等凡十五萬自范陽引而南步騎精銳煙塵百里時承平久民不識兵革郡縣望風瓦解祿山渡河進陷東京

帝聞河北皆從賊歎曰二十四郡曾無一人義士邪已而聞平原郡名即德州屬河北道今山東濟南府陵縣太守顏真卿起兵討賊大

喜曰朕不識真卿作何狀乃能如此常山郡名即恆州屬河北道今直隸正定太守顏杲卿亦起兵討賊河北諸郡應之杲卿真卿

之從兄也十五年七月以後肅宗至德元年祿山自稱燕帝其將史思明攻陷常山執杲卿送洛陽祿山數其反已杲卿曰我為國討賊恨不斬汝何謂反也臊羯狗何不速殺我祿山大怒縛而尚之比死罵不絕口

朔方節度使治靈州郭子儀河北節度使治所不詳李光弼與史

思明戰大破之復河北十餘郡帝促兵馬副元帥哥舒翰擊賊戰於靈寶縣名屬陝州今同大敗麾下執翰降賊賊入潼關

在陝西同州府華陰縣東今置廳帝倉皇出奔次於馬嵬驛名在陝西西

將士飢疲皆憤怒殺楊國忠等逼帝縊殺楊貴妃然後發  
父老遮道請留帝命太子亨慰撫之父老擁太子馬不得  
行太子乃使子廣平王俶馳白帝帝使喻太子曰汝勉之  
西北諸胡吾撫之素厚汝必得其力且宣旨欲傳位太子  
不受

太子至平涼

郡名即原州屬關內道今甘肅平涼府

朔方留後杜鴻漸等迎

入靈武

郡名即靈州

請遵馬嵬之命牋五上太子乃即位是為

肅宗皇帝遙尊玄宗為上皇天帝郭子儀將兵自河北至  
軍威稍振玄宗至成都命宰相奉傳國寶玉冊詣靈武在  
位四十四年

京兆李泌幼以才敏聞肅宗在東宮嘗與泌為布衣交至

是遣使召之事無大小皆與之議以廣平王為天下兵馬

元帥請泌為侍謀長史遣使借兵於回紇祿山自起兵以

來目昏又病疽躁暴愛嬖妾子欲代長子慶緒為嗣至德

二年慶緒殺祿山而自立使史思明鎮范陽肅宗至鳳翔

郡名即岐州屬京畿道今陝西鳳翔府

回紇葛勒可汗遣其子葉護將精兵

來援廣平王與副元帥郭子儀帥朔方等軍及回紇西域

之眾進擊破賊收復西京廣平王留鎮撫三日引軍東出

與回紇夾擊賊大敗遂復東京慶緒走保鄴郡

即相州屬河北道今

河南彰德府

帝入西京上皇亦自蜀還廣平王後為太子更名

豫

祿山之入河南也真源

縣名屬亳州今河南歸德府鹿邑縣

令張巡起兵雍

邱縣名屬汴州今河南開封府杞縣

屢破賊既而入睢陽

郡名即宋州屬河南道今歸德

府與太守許遠共守賊將尹子奇攻之巡屢卻之城

食盡或欲棄城巡遠謀曰睢陽江淮之保障若棄之賊必長

驅是無江淮也不如堅守以待救食馬馬盡羅雀掘鼠雀

鼠又盡至括城中婦人老弱食之城兵一萬僅餘四百終

無叛者賊登城將士病不能戰城遂陷巡遠等被殺及慶

緒北走陳留郡名即汴州今開封府

人殺尹子奇以降江淮之免寇

巡遠之力也

乾元元年肅宗三年命郭子儀李光弼等九節度使討安慶緒

以宦者魚朝恩為觀軍容使二年史思明引精兵救慶緒

官軍無統帥進退不一步騎六十萬潰於相州即鄴郡思明

殺慶緒還范陽稱燕帝帝使子儀總諸道兵朝恩惡而短

之帝召還子儀以光弼代之光弼治軍嚴整始至令一施

士卒壁壘旗幟精明皆變思明進軍復取東京光弼與戰

於河陽縣名屬洛州今河南懷慶府孟縣大敗之思明愛少子而欲殺長

子朝義上元二年肅宗六年朝義使人殺思明而自立

初肅宗在靈武張良娣有寵與宦者李輔國譖殺皇子倓

李泌知肅宗不足與有為及復兩京固請歸衡山其後良

史記卷一百一十五  
七十一  
弟爲皇后輔國掌禁兵與相表裏專權用事晚更有隙寶  
應元年

肅宗七年

玄宗崩時肅宗寢疾聞之轉劇后召太子豫

令誅輔國太子恐震驚上體不可輔國聞其謀夜勒兵幽

后捕其黨明日肅宗崩輔國弒后然後引太子立之是爲

代宗皇帝代宗畏輔國尊爲尙父宦者程元振勸代宗裁

抑之乃授王爵而罷其政尋爲盜所殺或曰代宗使之也

代宗求援於回紇回紇牟羽可汗

葛勒可汗之子葉護之弟

自將兵來

帝以皇子雍王适爲元帥僕固懷恩副之總諸道兵與回

紇共討史朝義大破之取東京朝義北走廣德元年賊將

李懷仙殺朝義以降僞燕平雍王後爲儲君德宗皇帝是

也

吐蕃在高宗世既滅吐谷渾盡臣羊同党項諸羌國勢益

盛屢與唐相攻及安史之亂起西邊精兵皆入援留者單

弱吐蕃乘間蠶食盡取河西隴右遂自涇州

屬關內道今屬甘肅省

進入長安代宗倉猝出奔陝州

屬都畿道今屬河南省

急命郭子儀

禦之子儀張疑兵逼長安吐蕃引去

是時程元振專恣忌嫉功臣皆欲害之吐蕃入元振掩蔽

不以時奏致帝狼狽帝發詔徵諸道兵李光弼等皆惡元

振莫有至者中外切齒帝不得已削其官爵放之光弼素

與郭子儀齊名以太尉河南副元帥鎮臨淮

郡名卽泗州屬河南道今

屬安賜爵臨淮王尋遷徐州屬河南道今江蘇徐州府擁兵不朝麾下

諸將不復稟畏光弼愧恨成疾而卒

僕固懷恩負功偃蹇又為中官所忌懼而反永泰元年代宗

三誘回紇吐蕃侵唐代宗使郭子儀屯涇陽縣名屬京兆府今屬陝西

吐蕃先是懷恩給言子儀已死子儀使至回紇不信曰郭

公果在可得見乎使還報子儀與數騎出使人傳呼曰令

公來大帥藥葛羅執弓矢立陳前子儀免胄投槍而進諸

酋長相顧曰是也皆下馬羅拜子儀亦下馬執藥葛羅手

與語取酒誓約而還吐蕃聞之夜遁回紇與唐兵共追大

破之子儀勳德並高為司徒中書令汾陽王以關內河東

副元帥鎮河中今山西蒲州府或邠州代宗禮重之讒閒不行雖

不豫朝政夷夏皆服其威名唐室以其身為安危殆三十

年德宗尊為尚父建中二年卒八子七壻皆顯將佐為名

臣者甚眾

第六篇

唐下

第一章 藩鎮跋扈

附德宗失政

初西魏宇文泰爲府兵法置百府府有郎將分屬二十四軍籍民爲府兵以農隙教戰馬蓄糧備六家供之太宗本其制置折衝府六百有餘皆隸諸衛及東宮六率十人爲火火有長五火爲隊隊有正六隊有團團有校尉每府三四團折衝都尉領之民年二十爲兵六十而免當宿衛者番上兵部以遠近給番遠疎近數皆一月而更有征行則命將將之事解輒罷兵散於府將歸於朝其後法制漸壞衛士逃匿日眾開元中張說建議募壯士充宿衛尋定長

從宿衛之士名曰曠騎總十二萬人分隸十二衛州縣毋得雜役使自此府兵死亡者有司不復點補宿衛邊戍皆召募而足兵農始分

唐承周隋之制於諸州要重地設總管府以總鎮兵後改曰都督府而州縣之政則朝廷時遣使巡察睿宗置二十四都督以糾刺史以下善惡已而以其權太重罷之更置十道按察使玄宗改十道為十五道分關內置京畿

陝今陝西鳳翔同州興安四府及邠乾商三州分河南置都畿今河南河南懷慶及陝汝分山南為東西二道山南東道今湖北及河

西道今陝西漢中府及四川東北境分江南為江南東西黔中三道江南東府及四川東北境分江南為江南東西黔中三道江南東

蘇大江以南及閩浙江南西道今江西省及安徽大江以南湖北武昌府湖南東境黔中道今四川省西陽州湖北施南府湖南西境道置采訪處置使以檢察非法如漢刺史及貴州大半

高宗以來邊州都督帶使持節者有節度使之號玄宗於四邊皆置節度使每以數州為一鎮迨天寶初有十大鎮安西節度治安西都護府統龜茲

庭都防制突騎施西突厥別種在北庭府西堅昆勅勒別庭府北今俄國河西節度治涼州今甘肅涼州府斷割吐蕃突厥朔方節度治靈州安北單于捍禦突厥河東節度治太原府與朔方掎角以禦突厥范陽節度治幽州臨制奚契丹平盧節度

治營州安東鎮撫室韋鞞隴右節度治鄯州今甘肅西甯府備禦

吐蕃劔南節度治益州今四川成都府西抗吐蕃南撫蠻獠嶺南節

度治廣州今廣東廣州府安南都護府屬之綏靜南海諸國鎮兵凡五十萬人

節度使各統數州州吏盡為其屬故多兼按察采訪安撫

度支等使既握兵甲又掌土地人民財賦於是方鎮日強

國勢偏重竟致天寶之亂及安史據洛陽河南山南江淮

諸道亦皆列置鎮府州縣之政多歸於武臣之手矣

祿山之反也平盧諸將劉客奴董秦王玄志等舉鎮歸朝

玄宗以客奴為節度使賜名正臣已而玄志醜正臣代之

玄志卒肅宗遣中使往撫將士察軍中所欲立者以旌節

授侯希逸自是諸軍驕橫動輒殺逐主帥朝廷亦不治其

罪也董秦入朝賜姓名李忠臣後為淮西節度使領蔡申光安等

州治蔡州今河南汝甯府希逸移鎮淄青領沂青徐密海六州仍兼

平盧之稱

僕固懷恩敗史朝義賊將薛嵩張忠志田承嗣李懷僊皆

降懷恩恐賊平寵衰奏留嵩等分帥河北自為黨援朝廷

亦厭苦兵革苟冀無事即以忠志鎮成德軍領恆趙深定

州今直隸賜姓名李寶臣嵩鎮相衛領相衛邢洺貝磁六

正定府德承嗣鎮魏博領魏博德滄瀛五州懷僊鎮盧龍領幽

檀平營六州治永泰元年代宗平盧將李懷王逐侯希逸



代宗因以懷玉知留後賜名正己正己與河北諸鎮皆結  
爲婚姻互相表裏收安史餘黨治兵完城不供貢賦代宗  
不能制

大厯三年

代宗六年

幽州將朱希彩殺李懷僊自稱留後七年

將吏又殺希彩推朱泚爲帥八年相衛薛嵩卒叔父粦代  
之朝廷皆因授旌節九年朱泚入朝使弟滔領鎮十年魏  
博田承嗣襲取相衛十四年承嗣卒姪悅代之淮西將李  
希烈逐李忠臣詔以希烈爲留後是歲代宗崩在位十七  
年太子适立是爲德宗

德宗初立勵精求治革弊政去奢靡李正己畏帝威名表  
獻錢三十萬同平章事崔祐甫請遣使慰勞淄青將士因  
以其錢賜之正己慚服時人以爲太平庶幾可望帝卜相  
於祐甫祐甫薦楊炎擢同平章事旣而祐甫病不視事建  
中元年炎建議作兩稅法事詳第九篇

當玄宗時中國富庶民口至五千餘萬安史之亂什亡七  
八州縣多爲藩鎮所據貢賦不入國庫耗竭中原多故戎  
狄連歲犯邊所在宿重兵給費不貲皆倚辦於劉晏晏善  
治財計自肅宗以來領度支鑄錢鹽鐵轉運等使幹鹽利  
通漕運制百貨之低昂軍國之用賴以充足而民不困弊  
至是楊炎忌晏譖貶之人希炎旨告晏怨望德宗遣中使

縊之二年擢盧杞與炎並相杞貌醜色如藍性陰狡有口辨逐炎殺之而專權朝政自此亂矣

成德李寶臣卒子惟岳代之平盧李正己亦卒子納代之魏博田悅與納惟岳連兵拒朝命德宗遣馬燧等討之三年燧大破悅等成德將王武臣殺惟岳代之與幽州朱滔共發兵救悅悅等推滔為盟主滔乃自稱冀王悅稱魏王武俊稱趙王納稱齊王各置百官仍用唐年號如古諸侯奉周正朔淮西李希烈亦舉兵應四鎮盧杞惡顏真卿欲陷之四年遣宣慰希烈人言失一元老為國家羞真卿至希烈脅之不屈留二歲竟被殺

德宗用兵兩河

謂河南河北

府庫不支先括富商錢又增諸道

稅竟行稅閒架除陌錢法稅閒架者計民屋廣狹課稅除陌錢者公私給與及賣買每百官留五錢敢隱匿有罰告者賞錢使坐者出之於是愁怨之聲盈於遠近

帝發涇原

鎮名領二州治涇州

等道兵討李希烈涇原兵過京師詔

犒師惟糲食菜餼眾怒作亂入城帝出奔奉天

縣名屬京兆府今陝

西乾

州亂兵奉太尉朱泚為主司農卿段秀實謀誅泚不克

而死泚稱秦帝急攻奉天渾瑊力拒李懷光李晟帥眾赴援泚敗歸長安懷光至奉天欲入白盧杞之姦杞隔之不得入見而行意殊怏怏上表暴杞罪惡眾論亦喧騰咎杞

帝不得已貶之帝使人說田悅王武俊李納赦其罪賂以官爵悅等皆密歸款陸贄勸帝罪己以謝國人故奉天所下書詔雖驕將悍卒聞之感泣興元元年德宗五年大赦罷閒架除陌等稅武俊悅納皆去王號上表謝罪惟李希烈恃富强遂僭號楚帝

李懷光反於咸陽與朱泚連兵帝奔梁州

今陝西漢中府懷光東

據河中李晟督諸軍克復長安泚西走其將斬之以降帝

還長安貞元元年

德宗六年

馬燧等平河中懷光縊死二年淮

西將陳僊奇殺希烈以降吳少誠又殺僊奇帝因以少誠領鎮

代宗嘗徵李泌於衡山與議國事欲授以相位泌固辭而

止德宗又徵之遂以同平章事泌有謀略盡心輔導帝頗

任之為相二歲而卒八年陸贄同平章事十年以論裴延

齡奸邪罷相贄自奉天以來宣力最多隨事論諫剴切白

奏帝追仇盡言延齡又譖之十一年貶忠州

今屬四川省

別駕

初泌薦處士陽城為諫議大夫人皆想望風采在職七年

而不諫韓愈作爭臣論譏之至是城率諸諫官守闕論延

齡姦佞贄無罪時且相延齡城曰脫以延齡為相當取白

麻壞之慟哭於庭遂沮不相城坐貶白麻者任將相制書

也

是時藩鎮布列四方凡四十餘道兵強則逐帥帥強則叛君兩河諸鎮幽州成德魏博平盧淮西等驕傲最甚殆同化外吳少誠侵掠鄰州十六年命韓全義統十七道兵討之官軍不戰而潰明年詔赦少誠德宗性多猜忌用賢不終寵任閹宦及貪吏末年稅政益多其處藩鎮也姑息而已在位二十六年崩太子誦立是為順宗

### 第二章 憲宗英武

順宗有風疾失音即位僅八月傳位太子純是為憲宗憲宗初立與同平章事杜黃裳論及藩鎮黃裳陳姑息之弊欲以法度裁制諸鎮帝深然之元和元年西川節度使益領

彭蜀漢眉嘉邛簡資茂黎雅等州治成都劉闢侵東川鎮名領梓遂綿劍普榮陵合渝瀘十州治梓川

今四川潼川府黃裳薦高崇文討之崇文克成都擒闢送京師斬

之夏綏鎮名領夏綏銀宥四州治夏州留後楊惠琳拒命詔討之惠琳為

兵馬使所斬二年鎮海節度使領潤蘇常湖杭睦六州治潤州今江蘇江甯府李

錡反亦討之兵馬使執錡送京師斬之

自杜黃裳以後相繼為相者武元衡裴垪李藩李絳皆賢相惟李吉甫頗佞媚垪器局峻整人不敢干以私藩絳皆好直諫知無不言帝重之絳數與吉甫爭論於帝前帝多從絳言時朝士如崔羣白居易等皆讜直元和之世朝廷清明以此七年魏博節度使田季安田承嗣之孫卒將士推兵

馬使田興爲留後興請吏於朝輸貢賦詔以爲節度使遣  
裴度宣慰賜錢百五十萬緡犒其軍六州魏博相衛貝瀛百姓皆  
給復一年軍士受賜歡聲如雷諸鎮使者見之相顧失色  
平盧淮西成德皆遣遊客閒說多方興終不聽賜興名弘

正

初淮西節度使吳少誠卒其將吳少陽自領軍府陰聚亡  
命少陽卒子元濟代之縱兵侵掠及東畿十年詔發十六  
道兵討之平盧節度使李師道李納之子成德節度使王承宗  
王武俊之孫皆請赦元濟不許裴度宣慰淮西行營還言淮西  
可決取帝悉以兵事委武元衡師道素養刺客姦人客請

曰密往刺元衡則佗相必爭勸天子罷兵矣師道遣之元  
衡入朝賊暗射殺之又擊裴度傷首帝怒討賊愈急曰吾  
倚度一人足破二賊以度同平章事委以兵事諸軍久不  
克十二年度兼淮西宣慰招討使督諸將進討唐鄧節度  
使領唐隨鄧三州治鄧州今河南南陽府屬州李愬李晟之子先擒賊將李祐釋而  
用其計雪夜引兵襲蔡州城擒元濟檻送京師斬之  
淮西已平諸鎮皆懼十三年王承宗納質請吏且獻二州  
幽州節度使劉總亦專意歸朝惟李師道依違不服詔諸  
道討之十四年田弘正李愬敗平盧兵平盧將執師道斬  
之代宗以來兩河跋扈垂六十年至是盡遵朝命矣

自淮西平帝浸驕侈度支使皇甫鏘鹽鐵使程异以聚斂有寵並同平章事朝野駭笑元和之政非矣鏘黨擠裴度罷其政出爲節度使度自此無意世事治園池與詩人觴詠自娛穆宗敬宗時皆一入輔政至文宗世亦平章軍國重事與時浮沈而已然四朝將相威望遠達四夷四夷見唐使輒問度安否以身繫國家輕重如郭汾陽者二十餘年

### 第三章 宦官之禍

太宗定制內侍省不置三品官黃衣廩食守門傳命而已中宗時嬖倖猥多宦官漸盛玄宗誅太平公主以內給事高力士有功擢爲右監門將軍知內侍省事是後宦官除三品將軍者寢多玄宗豪奢宮嬪至四萬闈宦隨增員衣朱紫千餘人黃衣以上三千餘人力士與楊思勗最貴幸思勗數將兵出平叛蠻以功爲輔國大將軍力士常居中侍衛表奏皆先呈力士然後奏御小事卽決之勢傾內外加驃騎大將軍肅宗在東宮以兄事之諸王公主呼爲翁自李林甫安祿山輩皆由之以取將相然性和謹不敢驕橫故玄宗終親任之士大夫亦不甚疾也

肅宗代宗皆庸弱倚宦官爲扞衛於是有李輔國程元振之專橫李程旣黜魚朝恩爲天下觀軍容宣慰處置使專

應仁史略卷三十一  
三十一  
典禁兵權寵無比大厯初判國子監事宦者管國學曠古之大異也時元載王縉爲相紀綱不修朝恩執易升高座講鼎覆餗以譏之縉怒載怡然朝恩曰怒者常情笑者不可測也朝政有不預者輒怒曰天下事有不由我者邪代宗聞之不懌載乘閒奏其專恣不軌遂誅之

德宗懲涇卒之變且猜忌宿將以左右神策神威等軍委內官主之置護軍中尉自是禁軍常屬闈寺又有樞密之職機務之重亦爲所參預攬權樹威挾制中外主勢下移積重難返憲宗自恃英武禍生於所忽嘗寵吐突承璀以爲神策中尉承璀欲立豐王憚爲太子太子恆憂之元和

十五年内常侍陳弘志弒帝其黨共殺承璀及憚引太子

立之是爲穆宗穆宗在位四年崩太子湛立是爲敬宗穆

敬荒淫無度樞密使王守澄專制國事是時河朔三鎮

魏博

成德皆叛迄於唐亡不能復取敬宗性褊急動捶左右皆

怨懼在位二年爲宦官所弒守澄等發禁兵討賊斬之迎

皇弟江王涵立之更名昂是爲文宗

文宗太和二年親策制舉人時宦官益橫權出人主之右

人無敢言賢良方正劉蕡對策極言其禍考官皆歎服而

不敢取裴休李邵杜牧等二十二人中第皆除官物論囂

然稱屈諫官御史欲論奏執政抑之李邵曰劉蕡下第我

輩登科能無厚顏上疏乞回所授官以旌黃直不報

文宗素患宦官強盛擢宋申錫同平章事與謀誅之五年中尉王守澄等使人誣告申錫謀廢立帝信之貶申錫坐死徙者數十百人帝惡鄭注媚附守澄欲誅之然畏守澄

釋之後卒寵之注引李訓見守澄守澄以薦於帝訓僮僕尚氣多權數帝悅之訓注揣知帝意數以微言動之帝告

以誠二人遂以誅宦官爲己任九年進擢宦者仇士良以

分守澄之權訓頗忌注託以中外協勢出注鎮鳳翔

鎮名治鳳

翔府兼訓同平章事先遣中使酖殺守澄尋令人奏金吾

領隴州聽事後石榴有甘露時人皆以甘露爲祥瑞宰相帥百官

稱賀訓勸帝往觀帝先命宰相視之訓還奏非真帝顧仇

士良令帥諸宦者往視士良等至俄風吹幕起見執兵者

無數驚走告變訓呼金吾衛士等上殿縱擊僅殺傷十餘

人訓知事不濟而走士良等命神策兵出戰殺吏卒二千

餘人執宰相王涯賈餗舒元興等誣以謀叛腰斬之訓被

捕死注亦爲鳳翔監軍所斬皆滅其族孩穉無遺世謂之

甘露之變自是宦官氣燄益熾迫脅君主陵暴朝士國事

皆決於北司宰相行文書而已

文宗卽位初勵精求治去奢從儉中外翕然謂太平可冀然制於宦寺竟不能有爲末年問學士周墀曰朕何如周



報漢獻墀驚曰彼亡國之主豈可比聖德帝曰報獻受制強諸侯今朕受制家奴殆不如也泣下霑襟在位十四年立敬宗子陳王成美爲太子臨崩欲以成美監國仇士良等以成美立不由己矯詔廢之立皇帝潁王灋爲太弟帝崩太弟殺成美而卽位後改名炎是爲武宗

武宗時士良以老病致仕其黨送歸士良教之曰天子不可令閑常宜以奢靡娛之使無暇及他事慎勿使之讀書親近儒生彼見前代興亡心知憂懼則吾輩疎斥矣其黨拜謝而去

是後宣宗懿宗僖宗昭宗亦皆宦官所立宰相不得預知居肘腋之地爲腹心之患其勢旣成雖有英君亦無如之何公卿大臣俯伏受制雄藩巨鎮多出其門至自稱定策國老目其主爲門生禍始於玄宗盛於肅代成於德宗至昭宗而極其閒傷賢害能召亂致禍賣官鬻獄沮敗師徒蠹害烝民者不暇徧舉也

#### 第四章 牛李之黨

李吉甫相憲宗時牛僧孺李宗閔對制策譏切時政吉甫惡之穆宗初吉甫子德裕爲翰林學士構貶宗閔自是各分朋黨更相傾軋穆宗以僧孺爲相德裕出外敬宗初僧孺亦出文宗徵德裕爲兵部侍郎裴度薦其可爲相宗閔

有宦官之助遂相因出德裕且引僧孺並相相共擯逐德裕之黨

德裕鎮西川日召老於邊事者訪以地勢皆若身歷練士

卒葺堡障以備邊蜀人安之太和五年吐蕃將悉怛謀以

維州今四川茂州保縣叛請降於唐德裕受之時吐蕃方與唐和

僧孺恐失信於鄰國詔歸城及叛將吐蕃誅之境上德裕

由是怒僧孺益深

僧孺罷德裕入相宗閔亦罷宗閔再相德裕又罷二黨互

相擠援文宗每歎曰去河北賊易去朝中朋黨難宗閔尋

罷及武宗立召德裕相之會昌三年德裕追論維州事加

悉怛謀褒贈

昭義節度使領澤潞磁邢洺五州治潞州今山西潞安府劉從諫卒姪稹自領

軍府德裕曰澤潞二州名謂昭義軍事體與河朔三鎮不同河朔

習亂已久累朝置之度外澤潞近處心腹若又因而授之

則威令不復行於諸鎮矣武宗問何以制之對曰稹所恃

者三鎮但得鎮州名即故恆州謂成德軍魏即魏博不與之同稹無能為

也遣重臣諭鎮魏討之乃賜詔曰澤潞一鎮與卿事體不

同勿為子孫之計使存輔車之勢鎮魏悚息聽命官軍與

二鎮兵各進討

四年河東都將楊弁作亂逐節度使武宗遣中使曉諭且

覘之中使受賂還言其強盛難取德裕奏微賊決不可恕如國力不支甯捨劉稹河東兵出戍者聞朝廷令客軍取太原恐妻孥被屠乃歸擒弁送京師斬之未幾劉稹勢窮蹙潞人殺稹以降澤潞平德裕秉政日久好徇愛憎誣僧孺宗閔與劉從諫交通遠竄之六年武宗崩宣宗立宣宗惡德裕之專罷其政三貶至崖州今廣東瓊州府司戶以死

第五章 宣宗明察

宣宗名忱憲宗庶孽子也於敬文武爲叔父初封光王幼號不慧太和以後益自韜匿文宗好誘其言以爲戲笑武宗豪邁尤不禮之武宗疾篤中尉馬元贄等定策禁中立

爲皇太叔權勾當軍國事裁決咸當理人始知有隱德遂

承武宗後肅宗時吐蕃強大党項諸部畏偪請內徙散處

靈今甘肅甯慶等州後寢繁盛數寇掠其留者皆

役屬於吐蕃會昌以來吐蕃衰亂宣宗大中三年隴右諸

州歸唐五年沙州今甘肅安西人張義潮亦以河西降於

是河湟故地盡復宣宗欲遂平党項從容與學士畢誠論

邊事誠具陳方略帝悅曰不意頗牧近在禁廷卽用爲邠

甯帥領邠甯慶衍誠招降党項北邊始安

宣宗聰察強記有司奏全國獄吏卒姓名一覽皆記之嘗

密令學士韋澳纂次州縣境土風物及諸利害爲一書號

日處分語刺史有入謝而出者曰上處分本州事驚人澳問之皆處分語中事也好挾摘隱微以驚服羣下小過必罰而大綱不舉外則藩方數逐其帥內則宦者握兵柄自如也然聽納規諫重惜爵賞恭謹節儉惠愛民物故大中之政訖於唐亡人思詠之謂之小太宗

宣宗嘗召韋澳屏左右問之曰近日內侍權勢何如對曰陛下威斷非前朝比帝閉目搖首曰全未全未尚畏之耳又嘗與宰相令狐綯謀盡誅宦官綯恐濫及無辜密奏曰但有罪勿捨有闕勿補自然漸耗至盡宦者竊見其奏由是益與朝士相惡南北司如水火矣帝長子鄆王漼無寵

十三年帝疾篤密以第三子夔王滋屬樞密使王歸長等使立之帝崩中尉王宗實殺歸長等迎鄆王立之是爲懿宗

### 第六章 唐末大亂

姚州今雲南楚雄府屬州之西有六詔詔者蠻語謂王也蒙舍詔最

在南今雲南蒙化廳謂之南詔開元末南詔皮邏閣兼五詔脅服

羣蠻其後悉取雲南地至酋龍皮邏閣六世孫稱帝國號大理出

兵陷播州州名今貴州遵義府邕州州名今廣西南甯府安南懿宗遣將擊之發徐

泗兵戍桂州今廣西桂林府過期不得代咸通九年戍卒怒作亂

北還所過剽掠至徐州囚觀察使陷諸州縣招討使康承

訓以沙陀朱邪赤心為前鋒擊平之沙陀出自西突厥勁  
勇冠諸胡初屬唐後附回紇及吐蕃元和中舉部歸唐唐  
置之北邊用以征討所向皆捷至是賜赤心姓名李國昌  
為大同軍節度使領雲朔蔚三州治雲州今山西大同府尋遷振武軍領綏銀麟

勝等州治單于都護府

懿宗好奢侈每遊幸扈從十餘萬人用兵不息賦斂愈急  
在位十四年崩宦官立帝少子普王儼時年十二是為僖  
宗僖宗專事遊戲政事一委中尉田令孜呼為阿父籍兩  
市商貨悉輸內庫有陳訴者杖殺之關東水旱州縣不以  
實聞百姓流殍無所告所在相聚為盜

乾符二年王仙芝倡亂於曹州名今山東濮州名今屬曹州府曹縣濮州名今屬曹州府冤

句縣名屬曹州故城在曹州府城西南人黃巢聚眾應之仙芝橫行河南山

南江淮諸州侵掠累年敗於申州今河南汝甯府信陽州殪於黃梅

縣名屬蘄州今屬湖北黃州府黃巢陷鄆州名今山東泰安州名今山東沂州府濮

南渡陷江西即江南西道諸州攻剽州名今福建福州府建州名今福建建甯府

西寇嶺南北屠潭州今湖南長沙府敗於荆門縣名屬荆州今湖北安陸府荆州

東走轉掠江南廣明元年僖宗七年渡江渡淮進陷東都鼓行

而西破潼關入長安僖宗奔蜀巢殺唐宗室自稱齊帝

李國昌之子克用為兵馬使戍蔚州隸大同軍今屬直隸宣化府大同

軍諸將謀曰今天下大亂朝命不行此乃英雄功名富貴

之秋也李振武名聞天下其子勇冠諸軍若輔以舉事代北不足平也遣人潛往說克用克用乃趣雲州大同軍治所取

之已而為盧龍兵所破國昌亦戰敗部眾潰父子亡入韃

鞑本鞑鞑之別部居陰山之北後為漢北諸部之總稱朝廷赦其罪召使討賊中和

二年僖宗九年克用將沙陀來兵皆衣黑賊憚之曰鷓軍至矣

當避其鋒三年與諸道兵大破賊復長安黃巢焚宮室遁

去官軍入城焚掠坊市無異於賊詔以克用為河東節度

使四年巢趣汴州宣武軍治所今河南開封府克用等追擊破之賊黨

斬巢以降

礪山縣名屬宋州今屬江蘇徐州府人朱温為巢將從入關見巢勢蹙降

於唐賜名全忠為宣武節度使領汴宋毫潁等州治汴州克用之至汴

也全忠館之甚恭克用乘醉頗侵之全忠不平發兵圍攻

克用遁歸晉陽治甲兵表請討全忠詔和解之不聽

光啟元年僖宗十年帝還長安田令孜忌河中帥王重榮欲

徙之重榮不肯令孜遣邠甯帥朱玫等攻河中克用救之

進逼京城令孜劫帝奔興元府名故梁州今陝西漢中府長安復為亂

兵焚掠二年玫立襄王煜肅宗玄孫稱帝玫將王行瑜斬玫煜

奔河中重榮殺之傳首行在三年帝始逐令孜尋還長安

僖宗在位十五年日與宦官相處而已國內大亂盜賊蠡

起豪傑因起其間互相吞噬朝廷不能制帝疾大漸觀軍

容使楊復恭立皇弟壽王傑為太弟帝崩太弟即位是為昭宗昭宗有英氣抱恢復之志尊禮大臣夢想賢豪踐祚之初中外忻忻焉然而內制於闕寺外有強鎮初志遂空

乾甯二年

昭宗七年

靜難

軍號即邠甯節度

王行瑜鳳翔李茂貞鎮國

軍號治華州今陝西同州府屬州

韓建三帥舉兵犯闕殺宰相謀廢立聞

李克用來討乃去克用克邠州行瑜走死將移兵鳳翔貴

近恐沙陀太盛沮之克用進爵晉王還晉陽三年茂貞復

犯闕昭宗奔華州長安宮室市肆燔燒俱盡茂貞韓建聞

朱全忠營洛陽宮將迎駕皆懼光化元年

昭宗十年

奉帝歸長

安

三年帝與宰相崔胤謀殺兩樞密使宦官皆懼中尉劉季

述勒兵幽帝迎太子裕立之胤說神策將討季述天復元

年

昭宗十年

季述等伏誅帝復位黜裕為德王

崔胤欲盡誅宦官知謀泄事急遣朱全忠書令以兵迎駕

是時全忠既并兩河諸鎮取河中晉

州名今山西平陽府絳州名今屬山東

有挾天子令諸侯之意得胤書速舉兵來中尉韓全誨等

劫帝如鳳翔二年全忠圍之三年李茂貞殺全誨等與全

忠和解奉帝還長安全忠以兵驅宦官殺數百人其出使

外方者詔所在誅之存黃衣幼弱者數十人以備灑掃全

忠進爵梁王還汴自開元以來宦官擅威福者垂二百年

至是始殲滅而國亦隨亡矣史家譬諸木之有蠹曰灼木  
攻蠹蠹盡木焚信哉

全忠威振四方遂謀篡奪崔胤懼修兵備元祐元年

昭宗十六年

全忠密令其黨殺胤請帝遷都洛陽促百官東行驅徙  
士民秦中自古爲帝王州周秦西漢遞都於此劉趙苻秦  
姚秦西魏後周相間據之隋文帝營大興城在舊長安城  
東南二里今西安府城是也唐初因之後又增築當玄宗  
世長安之雄麗繁盛軼於前古黃巢亂後景象衰耗至是  
夷爲郡縣矣

帝至洛陽岐王李茂貞蜀王王建移檄討全忠皆以興復

爲辭全忠恐變生於中遣人弑帝在位十六年時德王裕  
已壯全忠惡之以輝王祚幼立之更名祝是爲哀帝殺裕  
等九王皆昭宗子全忠急於傳禪朝議先加九錫全忠怒  
不受天祐四年哀帝三年哀帝禪位於梁尋被殺唐自高祖及  
是二十世凡二百九十年





